

Lia hahu nian

¹Houri uluk kedas liafuan iha nanis; liafuan horik nanis ho Maromak. ²Houri uluk kedas Nia horik hamutuk ho Maromak. ³Maromak halo buat hotu hodi Nia; la hodi Nia buat ida la moris. ⁴Nia mak moris Na'in, no moris ne'e mak ema nia naroman. ⁵Naroman nabilan hela iha nakukun laran; nakukun la bele halakon nia.

⁶Mane ida mosu mai ne'ebé Maromak mak haruka; nia naran Joao. ⁷Nia mai nudar sasin ida atu fó sasin kona ba naroman atu ema hotu bele fiar hodi nia. ⁸Nia la'os naroman maibé nia mosu atu fó sasin kona ba naroman. ⁹Naroman los mai iha raiklaran, naroman ne'ebé leno ema hot-hotu. ¹⁰Nia horik nanis iha raiklaran; Nia rasik mak hakiak raiklaran, maibé raiklaran la hatene Nia. ¹¹Nia mai ba nia emar sira, maibé sira ne'e la simu Nia. ¹²Maibé, ba ema sira ne'ebé simu Nia hodi fiar nia naran, Nia haraik kbiit atu sai Maromak nia oan. ¹³Ema sira ne'e la mai housi ema nia ran, eh tuir ema nia isin nia hakarak; la'os housi ema nia hakarak, maibé housi Maromak. ¹⁴Liafuan ne'e halo An ba mane. Nia horik duni ho ita. Ami hare tebes nia gloria, gloria ne'ebé Nia simu housi Aman, nudar Oan Mane mesak, kmanek no los teb-tebes. ¹⁵Joao fó sasin kona ba Nia, dehan: "Ema ne'e mak Ida ne'ebé ha'u dehan ona katak Nia ne'ebé tuir ha'u mak uluk tiha ha'u, basa Nia uluk liu ha'u." ¹⁶Housi nia diak nakonu mak ita simu diak oi-oin tu-tuir malu. ¹⁷Basa ukunfuan mai housi Moises, maibé grasa no lialos mai housi Jesus Kristu. ¹⁸Ema ida la dauk hare Maromak; maibé Oan mane mesak ne'ebé horik ho Aman, Nia mak haklaken Maromak.

Joao fó sasin kona ba nia an

¹⁹Ida ne'e mak Joao nia sasin wainhira Judeu sira housi Jerusalem haruka am'lulik no levita sira atu husu ba nia: "O se los?" ²⁰Nia dehan sai, la heli lia dehan: "Ha'u la'os Messias." ²¹Sira husu ba nia: "O se los? O Elias?" Nia hatan, "Lae." "O Profeta?" nia hatan: "Lae." ²²Sira dehan ba nia: "O se los atu ami bele fó hatene ba sira ne'ebé haruka ami mai. O dehan sa ida kona ba o nia an?" ²³Nia dehan sai hanesan profeta Isaia hateten: "Ha'u mak lia ne'ebé hakilar iha rai fuik maran. Imi sei halos Na'i nia dalan." ²⁴Sira ne'e fariseu sira mak haruka, ²⁵Sira husu ba nia: "O la'os Messias, la'os Elias, la'os profeta: nusa mak o sarani ema?" ²⁶Joao hatan ba sira: "Ha'u sarani ho be, maibé iha imi nia leet iha Ida ne'ebé imi la hatene, ²⁷Ida ne'ebé mai tuir ha'u ne'ebé ha'u la soi atu kore nia sandalias tali." ²⁸Buat ne'e mosu iha Betania, iha mota Jordao nia sorin, iha ne'ebé Joao sei sarani hela.

Joao hatudu Jesus ba ema

²⁹Loron tuir mai, hare tiha Jesus hakbesik ba nia, Joao dehan: "Ne'e mak Maromak nia Bibi-Oan ne'ebé kasu munda nia sala. ³⁰Kona ba Ida ne'e mak ha'u dehan ona: 'Ema Ida sei mai tuir ha'u, ne'ebé ba ona uluk ha'u, tamba Nia iha ona uluk ha'u.' ³¹Ha'u uluk la hatene Nia, maibé ha'u sarani ho be, atu Nia bele hatudu an ba Israel." ³²Joao fó sasin, dehan: "Ha'u hare Espiritu Santu tun mai housi lalehan hanesan manu falur ida, ne'ebé mai tur iha nia leten. ³³Ha'u uluk la hatene Nia, maibé Ida ne'ebé haruka ha'u mai sarani ho be mak dehan mai ha'u: 'Ida ne'ebé o hare Espiritu tun ba Nia, hodi hela iha Nia, Nia mak sei sarani ho Espiritu Santu.' ³⁴Ha'u hare duni, hodi fó sasin katak Nia mak Maromak Oan."

Jesus hahu bolu eskolante sira

³⁵Liu tiha loraon ida, Joao hamutuk hela ho nia eskolante na'in rua. ³⁶Wainhira hare Jesus ne'ebé liu dau-daun, nia dehan: "Maromak nia Bibi-Oan mak neba!" ³⁷Rona tiha lia hirak ne'e, eskolante na'in rua ne'e tuir Jesus. ³⁸Hare sira tuir Nia, Jesus fila hodi husu ba sira: "Imi buka sa ida?" Sira hatan: "Rabbi, katak Mestre, Ita hela iha ne'ebé?" ³⁹Jesus dehan: "Imi mai hare." Sira ba duni, hodi hare Nia horik iha ne'ebé. Loron ne'e duni sira hela ho Nia kala tuku haat loraik. ⁴⁰Sira na'in rua ne'ebé rona Joao hodi tuir Jesus ne'e, ida mak Andre, Simao Pedro nia alin. ⁴¹Nia hetan uluk nia maun Simao hodi dehan: "Ami hetan ona Messias!" katak "Kristu." ⁴²Nia lori Simao ba Jesus. Jesus fihir nia, dehan: "O Simao, Joao nia oan; o sei hanaran an Cefas, katak Pedro." ⁴³Liu tiha loraon ida, Jesus hanoin atu ba Galileia. Nia hetan Filipe hodi dehan ba nia: "Tuir Ha'u mai!" ⁴⁴Filipe ema Betsaida, Andre no Pedro nia knua. ⁴⁵Filipe hare Natanael hodi dehan ba nia: "Ami foin hetan Ida ne'ebé Moises no profeta sira fó sai nanis, katak Jesus, Jose nia oan, housi Nazare." ⁴⁶Natanael hateten: "Buat diak ida bele mai housi Nazare?" Filipe hatan ba nia: "O mai hare." ⁴⁷Hare Natanael hakbesik ba Nia, Jesus dehan kona ba nia: "Ida ne'e mak ema Israel lo-los, iha ne'ebé la iha lia bosok!" ⁴⁸Natanael husu ba Nia: "O hatene ha'u oin sa?" Jesus hatan: "Molok Filipe bolu o, Ha'u hare ona o iha ai figueira okos." ⁴⁹Natanael dehan fali: "Rabbi, Ita mak Maromak nia Oan, Ita mak Israel nia Liurai!" ⁵⁰Jesus hatan: "Tan Ha'u hateten ba o katak Ha'u hare ona o iha ai figueira okos, mak o fiar? O sei hare buat boot liu ida ne'e." ⁵¹Hafoin Jesus dehan ba nia: "Los duni, Ha'u dehan ba imi katak imi sei hare lalehan nakloke, Maromak nia anju sira sa'e tun ba Oan Mane."

Festa kaben nian iha Kana

¹Liu tiha loraon tolu, ema halo festa kaben nian iha Kana Galileia. Jesus nia inan iha neba. ²Jesus ho nia eskolante sira simu mos konvite ba festa. ³Tamba tua la iha ona, Jesus nia inan dehan ba Nia: "Sira nia tua hotu ona." ⁴Jesus simu dehan: "Na'in feto, ita atu halo sa los? Ha'u nia loraon la dauk to'o." ⁵Maibé nia inan dehan ba sira ne'ebé hein meja: "Imi halo tuir buat ne'ebé Nia haruka." ⁶Kusi neen iha neba, atu Judeu sira fase ain no liman; kusi ida-ida bele lori litru ualu nulu ka atus ida rua nulu. ⁷Jesus lia tun ba sira: "Imi tau be ba kusi sira ne'e to'o nakonu." Sira tau be nakonu di-diak to'o ibun. ⁸Hafoin Jesus dehan ba sira: "Imi bele hasai ona, lori ba uma na'in tenda." Sira lori duni. ⁹Uma na'in tenda koko tiha be nakfila ba tua (tan nia la hatene tua ne'e mai housi ne'ebé, maibé ema sira ne'ebé hein meja no kuru be hatene); nia bolu noivu ¹⁰hodi dehan: "Ema hotu fó uluk tua diak; konvidadu sira hemu di-diak ona, hafoin mak fó tua la dun diak. O fali rai subar tiha tua diak to'o oras ne'e." ¹¹Ne'e mak milagre uluk ne'ebé Jesus halo iha Kana Galileia. Nia hatudu nia gloria, nia eskolante sira fiar Nia.

¹²Liu tiha ne'e, Jesus ho nia inan, maun-alin no eskolante sira tun ba Kafarnaum. Sira hela loraon ruma iha neba.

Jesus hamos templu

¹³Besik dau-daun ona Judeu sira nia Paskua, Jesus sa'e ba Jerusalem. ¹⁴Iha templu laran, Nia hetan ema ne'ebé fa'an karau, bibi no falur, ho ema sira ne'ebé troka osan tur hela iha sira nia meja. ¹⁵Nia bobar tali hamutuk, hodi duni sai sira hotu housi templu hamutuk ho bibi no karau sira. Nia halo namtate ba rai ema troka osan sira nia osan, hodi halo taka-fila meja sira. ¹⁶Ba sira ne'ebé fa'an falur, Nia dehan: "Hasai buat hirak ne'e housi ne'e: keta halo Ha'u Aman nia uma sai uma kontratu ida." ¹⁷Eskolante sira hanoin kedas liafuan ne'ebé hakerek: "Tan badinas tau matan ba o nia uma, mak Ha'u lakon Ha'u an." ¹⁸Judeu sira husu ba nia: "Sinal sa los mak o bele fó mai ami atu hatudu katak o bele halo nune'e?" ¹⁹Jesus hatan ba sira: "Imi sobu templu ne'e, Ha'u sei harii fali nia iha loraon tolu nia laran." ²⁰Judeu sira dehan: "Ema halo templu ne'e iha tinan haat nulu resin neen nia laran, no o sei harii fali nia iha loraon tolu nia laran?" ²¹Maibé Jesus koalia kona ba templu nia isin nian. ²²Tan ne'e, wainhira Jesus moris hi'as housi mate, nia eskolante sira hanoin hikas katak uluk nia dehan nanis: nune'e sira fiar eskritura no lia fuan sira ne'ebé uluk nia dehan.

²³Wainhira Jesus sei hela iha Jerusalem, iha festa Paskua, ema barak fiar iha Nia naran, tan milagre sira ne'ebé Nia halo. ²⁴Maibé Nia la fiar sira, basa Nia hatene sira hotu. ²⁵Nia la kuran atu ema fó hatene ba Nia kona ema naran ida, basa Nia hatene buat sa los mak iha ema nia laran.

Jesus ho Nicodemos

¹Iha fariseu ida naran Nicodemos, emboot Judeu sira nian. ²Iha kalan nia mai koalia ho Jesus, dehan: "Rabbi, ami hatene katak Ita boot mai housi Maromak nudar mestre, tan ema ida la bele halo buat ne'ebé Ita halo wainhira Maromak la hela ho nia." ³Jesus hatan ba nia: "Tebe, Ha'u dehan ba o katak ema ne'ebé la moris fali, nia la bele hare Maromak nia reinu." ⁴Nicodemos hateten ba Jesus: "Oin sa ema katuas ida bele moris fali?" ⁵Nia bele tama fali iha inan nia

laran atu moris hikas?” Jesus hatan ba nia: “Tebes, Ha’u hateten ba o katak ema ne’ebé la moris housi be no Espiritu, nia la bele tama iha Maromak nia reinu. ⁶Buat ne’ebé moris housi isin, isin nian; no buat ne’ebé moris housi Espiritu Espiritu nian. ⁷Keta hakfodak tamba Ha’u dehan ba o, ‘O ten ke moris fali.’ ⁸Anin hu’u ba fatin ne’ebé nia hakarak; o rona nia lia, maibé o la hatene nia mai housi ne’ebé ka nia ba ne’ebé. Nune’e mos ho ema hotu ne’ebé moris housi Espiritu.” ⁹Nicodemos husu ba Jesus: “Buat ne’e bele sai oin sa los?” ¹⁰Jesus hatan ba nia: “O, mestre Israel nian, la hatene buat ne’e?” ¹¹Los duni Ha’u hateten ba o katak ami koalia kona ba buat ne’ebé ami hatene, hodi fó sasin kona ba buat ne’ebé ami hare ona; maibé imi la simu ami nia lia sasin. ¹²Imi la fiar Ha’u karik, wainhira Ha’u koalia kona ba sasan mundu ne’e nian, oin sa mak imi bele fiar wainhira Ha’u koalia kona ba sasan lalehan nian? ¹³Ema ida la dauk sa’e ba lalehan; ema ida deit: Ida ne’ebé tun housi lalehan, katak Oan Mane. ¹⁴Hanesan uluk Moises foti samea iha rai fuik maran, nune’e mos sira sei foti Oan Mane, ¹⁵atu ema hotu ne’ebé fiar Nia la bele lakon, maibé hetan moris rohan laek. ¹⁶Basa Maromak hadomi tebes mundu to’o fó Nia Oan Mane mesak, atu ema hotu ne’ebé fiar Nia la bele lakon, maibé hetan moris rohan laek. ¹⁷Maromak la haruka nia Oan mai iha mundu atu fó terus mundu, maibé atu mundu hetan maksoin hodi Nia. ¹⁸Ema ne’ebé fiar Nia la hetan kastigu, maibé ema ne’ebé la fiar hetan ona kastigu, basa la fiar iha Maromak nia Oan Mane mesak nia naran. ¹⁹Sira hetan kastigu nune’e: roman mai iha mundu, maibé ema sira hadomi nakukun liu fali roman, tamba sira nia hahalok aat. ²⁰Basa ema ne’ebé halo aat hakribi roman, la hakbesik ba roman atu ema la bele hare nia hahalok sira. ²¹Maibé ema sira ne’ebé moris tuir lialos hakbesik ba roman atu mosu mo-mos katak, buat hotu ne’ebé nia halo, halo iha Maromak.”

Joao nia sasin kona ba Jesus

²²Hafoin Jesus hamutuk ho nia eskolante sira ba rai Judeia. Nia hela ho sira iha neba hodi sarani ema. ²³Joao mos sarani iha Enon, besik Salim basa iha be barak iha neba no ema mai atu simu baptismu. ²⁴Joao seidaok tama iha dadur laran.

²⁵Joao nia eskolante sira haksasuk malu ho Judeu sira kona ba fase an tuir ukunfuan. ²⁶Sira mai husu Joao: “Mestre, Ida ne’ebé la’o hamutuk ho ita iha Jordao no ita fó sasin kona ba Nia, Nia mos sarani ema, no ema hotu ba hasouru Nia.” ²⁷Joao hatan: “Ema la bele simu buat ruma ne’ebé Maromak la fó ba nia. ²⁸Imi rasik mak bele fó sasin katak Ha’u dehan: ha’u la’os Messias, maibé ema ne’ebé Maromak haruka atu ba uluk Nia. ²⁹Ida ne’ebé iha noiva mak noivu; maibé noivu nia belun ne’ebé hamriik hodi rona nia, haksolok teb-tebes wainhira nia rona noivu nia lia. Ohin ha’u nia ksolok boot teb-tebes. ³⁰Nia sei sai boot liu no ha’u sei sai kiik liu.”

³¹Ida ne’ebé mai housi leten, Nia iha ema hotu nia leten. Ida ne’ebé mai housi rai, rai ne’e nian, nia koalia kona ba rai. Ida ne’ebé mai housi lalehan, nia aas liu hotu. ³²Nia fó sasin kona ba buat ne’ebé Nia hare no rona, maibé ema ida la simu nia sasin. ³³Ema ne’ebé simu nia sasin hametin liafuan ida ne’e, katak Maromak los. ³⁴Basa ida ne’ebé Maromak haruka, Nia fó sai Maromak nia liafuan, tamba Maromak haraik Espiritu tomak ba Nia. ³⁵Aman hadomi Oan no saran ba Nia buat hot-hotu. ³⁶Ema ne’ebé fiar Oan, nia hetan moris rohan laek; maibé ema ne’ebé lakohi fiar Oan, nia sei la hare moris, no Maromak nia hirus hela ho nia.

4

Jesus ho feto Samaritana

¹Wainhira Na’i hatene katak fariseu sira rona katak Jesus simu no sarani eskolante barak liu fali Joao; ²maski la’os Jesus mak sarani, maibé nia eskolante sira, ³Nia husik Judeia hodi fila fali ba Galileia. ⁴Nia ten ke la’o liu housi rai Samaria. ⁵Ne’e duni, Nia to’o iha Samaria nia sidade ida, naran Sikar, besik to’os ne’ebé Jacob uluk fó ba nia oan Jose. ⁶Jacob nia be matan iha neba. Jesus la’o loke ona; tan ne’e, Nia tur iha be matan nia sorin. Loron besik fahe rua ona. ⁷Feto Samaria nian ida mai kuru be. Jesus dehan ba nia: “Fó be mai Ha’u.” ⁸Eskolante sira ba iha sidade atu sosa aihan. ⁹Feto ne’e hatan ba Nia: “Oin sa mak O, ema Judeu ida husu be housi ha’u, ema Samaritana ida?” Tamba Judeu ho Samaritanu sira hare malu la diak. ¹⁰Jesus simu hodi dehan: “O hatene karik Maromak nia presente, no se los mak dehan ba o ‘Fó be mai Ha’u,’ o mak sei husu ba Nia, Nia sei fó be moris ba o.” ¹¹Feto dehan ba Nia: “Na’i, Ita kanaban la iha, be matan mos klean; ita nia be moris mai housi ne’ebé?” ¹²Ita kala boot liu fali ami nia aman Jacob ne’ebé fó be matan ne’e mai ami? Nia rasik hemu, nia oan sira, nia balada sira mos hemu.” ¹³Jesus hatan ba nia: “Ema ne’ebé hemu be ne’e, sei hamrook fali; ¹⁴maibé ema ne’ebé hemu be ne’ebé Ha’u sei fó, sei la hamrook tan, basa be ne’ebé Ha’u fó ba nia sei sai iha nia nudar be matan ne’ebé suli ba moris rohan laek.” ¹⁵Feto ne’e dehan: “Na’i, fó be ida ne’e mai ha’u, atu ha’u keta hamrook, nune’e ha’u lalika mai tan kuru be iha ne’e.” ¹⁶Jesus dehan ba nia: “Ba bolu o nia laen, hafoin fila mai iha ne’e.” ¹⁷Feto hatan: “Ha’u la iha laen.” Jesus dehan: “O dehan los, o la iha laen; ¹⁸basa o iha laen lima, no ida ne’ebé hela ho o dau-daun ne’e la’os o nia laen. Kona ba ne’e, o hateten los.” ¹⁹Feto hatan: “Na’i, ha’u hare katak Ita profeta ida. ²⁰Ami nia bei-ala sira adora iha foho ne’e; imi dehan fali katak iha Jerusalem mak ema sei adora.” ²¹Jesus dehan teni: “Feto, fiar Ha’u: loron sei to’o mai wainhira imi sei adora Aman la’os iha foho ne’e, mos la’os iha Jerusalem. ²²Imi adora buat ne’ebé imi la hatene, ami adora buat ne’ebé ami hatene, basa maksoin mai housi Judeu sira. ²³Maibé loron sei mai, lo-los mai tiha ona, wainhira ema ne’ebé adora lo-los sei adora Aman tuir espiritu no lialos: tamba Aman hakarak atu ema adora Nia nune’e. ²⁴Maromak mak espiritu, no sira ne’ebé adora Nia sei adora tuir espiritu no lialos.” ²⁵Feto hateten ba Nia: “Ha’u hatene katak Messias sei mai, ida ba naran Kristu; wainhira Nia mai, Nia sei hanorin buat hot-hotu.” ²⁶Jesus hatan: “Ha’u rasik mak koalia ho o.” ²⁷Iha oras neba eskolante sira to’o mai ona. Sira hakfodak tan hare Jesus koalia ho feto ida; maibé sira ida la husu ba Nia “Ita hakarak sa ida?” eh “Tan sa ita koalia ho nia?” ²⁸Husik tiha kanaban, feto ne’e halai ba sidade, hodi hateten ba ema sira: ²⁹“Imi mai hare ema ne’ebé hateten mai ha’u buat hotu ne’ebé ha’u halo. Nia mak Messias karik?” ³⁰Ne’e duni, sira sai housi sidade, hodi ba hare Jesus. ³¹Eskolante sira konvida Jesus, dehan: “Mestre, han ba.” ³²Maibé Nia hatan ba sira: “Ha’u iha aihan ne’ebé imi la hatene.” ³³Eskolante sira husu ba malu: “Ema ruma lori karik aihan ba Nia?” ³⁴Jesus dehan ba sira: “Ha’u nia aihan mak halo tuir Ida ne’ebé haruka Ha’u mai nia hakarak, hodi hala’o nia hahalok. ³⁵Imi la dehan, ‘Fulan haat tan, ema haknata han ona? Maibé Ha’u dehan ba imi: Imi foti matan, hodi hare ba to’os: aihan sira tasak hotu ona, hein deit atu haknata. ³⁶Haknata na’in sira simu ona sira nia kolen, hodi halibur ai-fuan sira ba moris rohan laek; nune’e, ida ne’ebé kuda no ida ne’ebé haknata bele haksolok hamutuk. ³⁷Ida ne’e hatudu lo-los lia ne’ebé dehan: ‘Ema ida kuda, ema seluk haknata.’ ³⁸Ha’u haruka imi atu ba haknata buat ne’ebé imi la kuda; ema seluk serbisu, imi mai manan deit sira nia kosarben.” ³⁹Ema Samaritanu barak housi sidade fiar Jesus tamba feto dehan: “Nia dehan buat hotu ne’ebé ha’u halo.” ⁴⁰Tan ne’e, wainhira sira mai hare Nia, sira husu ba Nia atu hela hamutuk ho sira. Nia hela duni loron rua. ⁴¹Ema barak liu tan fiar tamba nia liafuan. ⁴²Sira dehan ba feto ne’e: “La’os tamba buat ne’ebé o dehan, mak ami fiar; ami rasik rona no hatene katak, los duni, Nia mak mundu nia Maksoin.”

Jesus ba Galileia

⁴³Liu tiha loron rua, Jesus ba Galileia. ⁴⁴Nia rasik mak fó sai katak ema sira la simu di-diak profeta ida iha nia rai rasik. ⁴⁵To’o tiha Galileia, ema Galileia sira simu Nia di-diak, tamba sira hare ona buat hotu ne’ebé Nia halo iha Jerusalem, iha festa ne’ebé sira mos tuir ba.

Jesus fó isin diak ba funsionariu nia oan

⁴⁶Jesus fila fali ba Kana Galileia, iha ne’ebé Nia halo be nakfila ba tua. Iha Kafarnaum, iha funsionariu ida ne’ebé nia oan mane moras. ⁴⁷Rona tiha katak Jesus to’o ona Galileia housi Judeia, ema ne’e ba hasouru Nia hodi husu ba Nia atu mai fó isin diak ba nia oan, ne’ebé besik atu mate. ⁴⁸Jesus hateten ba nia: “Imi la hare karik sinal no milagre sira, imi la fiar.” ⁴⁹Funsionariu hatan ba Nia: “Mai, Na’i, molok ha’u nia oan mate.” ⁵⁰Jesus dehan: “Ba, o nia oan sei moris.” Ema ne’e fiar buat ne’ebé Jesus hateten ba nia, hodi fila fali ba uma. ⁵¹Nia sei la’o dau-daun, nia atan sira hasouru nia, hodi dehan katak nia oan sei moris hela. ⁵²Nia husu ba sira tuku hira nia oan hahu sai diak fali. Sira dehan: “Isin manas lakon house’ik besik tuku ida.” ⁵³Aman ne’e hanoin fali katak iha oras neba Jesus dehan ba nia: “O nia oan sei moris.” Ne’e duni, nia ho nia familia tomak fiar. ⁵⁴Dala rua ona mak Jesus halo milagre wainhira Nia mai iha Galileia housi Judeia.

5

Jesus bali ema isin mate ida iha pisina Betsaida nian

¹Tuir mai Jesus sa’e fali ba Jerusalem, iha ne’ebé Judeu sira halo festa. ²Iha Jerusalem, besik odamatan Bibi sira nian, iha pisina ida naran Betsata iha lia Ebreu, ne’ebé iha portiku lima. ³Iha neba tur hela ema moras barak (matan delek, ain aat no isin mate sira), ne’ebé hein atu be book an. ⁴Basa Na’i nia anju tun fila-fila hodi book be; ida ne’ebé tama uluk iha pisina, nia hetan kedas isin diak housi moras naran deit.

⁵Iha mos ema moras ida ne'ebé hein nune'e tinan tolu nulu resin ualu ona. ⁶Hare nia tur iha neba, hodi hatene katak nia hein kleur teb-tebes ona, Jesus husu ba nia: "O hakarak hetan isin diak?" ⁷Ema moras ne'e dehan: "Na'i, ha'u ema la iha atu hatama ha'u iha pisina laran wainhira be book an; nune'e wainhira ha'u hakbesik ba be, ema seluk tama tiha uluk liu ha'u." ⁸Jesus dehan: "Hamriik ba, kaer o nia biti hodi la'o ba." ⁹Teki-teki ema ne'e hetan isin diak. Hafoin nia foti nia biti hodi hahu la'o. Buat ne'e mosu iha loron Sabadu. ¹⁰Tan ne'e Judeu sira hateten ba ema ne'ebé foin hetan isin diak: "Ohin loron Sabadu; o la bele lori o nia biti." ¹¹Nia hateten ba sira: "Ema ne'ebé fó isin diak mai ha'u dehan mai ha'u: 'Kaer o nia biti, la'o ba!'" ¹²"Se mak dehan ba o, 'Kaer o nia biti, la'o ba?'" sira husu nia. ¹³Maibé ema ne'e la hatene se los tamba Jesus lakon kedad iha ema lubun boot nia leet iha fatin neba. ¹⁴La kleur Jesus hetan nia iha templu hodi dehan ba nia: "Hare ba, o isin diak ona; keta halo sala fali, atu buat aat liu tan la bele mosu ba o." ¹⁵Ema ne'e fila fali hodi hateten ba Judeu sira katak Jesus mak fó isin diak ba nia. ¹⁶Tuir mai, Judeu sira hahu duni Jesus, tamba Nia halo buat hirak ne'e iha loron Sabadu. ¹⁷Maibé Jesus hatan ba sira: "Ha'u nia Aman serbisu nafatin, nune'e mos Ha'u serbisu." ¹⁸Tan ne'e, Judeu sira buka liu tan atu oho Jesus, tamba Nia la halakon deit lisan loron Sabadu nian, maibé mos tamba Nia bolu Maromak nia Aman rasik hodi halo an hanesan Maromak.

Jesus nia liafuan kona ba nia an

¹⁹Jesus hatan ba sira: "Tebes, tebes, Ha'u dehan ba imi katak Oan la bele halo buat ida housi nia An rasik; Nia bele halo deit buat ne'ebé nia hare Aman halo, basa buat ne'ebé Aman halo Oan mos halo. ²⁰Basa Aman hadomi Oan hodi hatudu ba Nia buat hotu ne'ebé Nia halo, no Nia sei hatudu ba Nia hahalok sira ne'ebé boot liu fali sira ne'e. atu imi hakfodak. ²¹Basa nudar Aman halo ema sira moris hi'as fali hodi fó moris ba sira, nune'e mos Oan fó moris ba naran ema ne'ebé Nia fihir. ²²Aman la tesi lia ba ema ida, maibé husik Oan tesi lia hot-hotu. ²³atu ema hotu hamtauk Oan nudar sira hamtauk Aman. Ema ne'ebé la hamtauk Oan, nia la hamtauk mos Aman ne'ebé haruka Oan. ²⁴Tebes, tebes, Ha'u dehan ba imi: Ema ne'ebé rona Ha'u nia liafuan ne'e hodi fiar Ida ne'ebé haruka Ha'u mai, nia hetan moris rohan laek: ema ne'e la hetan kastigu, nia liu ona housi mate ba moris. ²⁵Tebes, tebes, Ha'u dehan ba imi katak loron besik ona, lo-los to'o ona mai, wainhira ema mate sira sei rona Maromak Oan nia lia, no sira hotu ne'ebé rona sei moris. ²⁶Basa, nudar Aman mak moris na'in, nune'e mos Nia halo Oan sai moris na'in, ²⁷hodi haraik ba Nia kbiit atu tesi lia, basa Nia mak Oan Mane. ²⁸Imi keta hakfodak ho buat ne'e, basa loron to'o dau-daun wainhira matebian sira hotu ne'ebé iha rate laran sei rona Nia lia, no ²⁹sira ne'ebé halo diak, sei sa'e ba moris rohan laek: sira ne'ebé halo aat sei hetan kastigu. ³⁰Ha'u mesak la bele halo buat ida. Ha'u tesi lia tuir buat ne'ebé Ha'u rona. Ha'u nia lia los tamba Ha'u la tuir Ha'u nia hakarak, maibé Ida ne'ebé haruka Ha'u nia hakarak. ³¹Ha'u fó sasin karik kona ba Ha'u an rasik, Ha'u nia sasin la los. ³²Ida seluk mak fó sasin kona ba Ha'u, no Ha'u hatene katak Nia sasin los. ³³Wainhira imi haruka ema ba Joao, nia fó sasin kona ba lialos. ³⁴Ha'u la simu lia sasin housi ema ida, maibé Ha'u dehan buat ne'e atu imi hetan maksain. ³⁵Joao mak ahi oan ne'ebé lakan hodi fó naroman, no imi hakarak haksolok uitoan iha nia naroman. ³⁶Maibé Ha'u nia sasin boot liu fali Joao nian, tamba hahalok sira ne'ebé Aman haruka Ha'u, hahalok sira ne'ebé Ha'u halo dau-daun katak Aman haruka Ha'u mai. ³⁷Aman ne'ebé haruka Ha'u mai, Nia rasik mak fó sasin kona ba Ha'u. Imi seidaok rona nia lia, seidaok hare nia oin; ³⁸nia liafuan la hela iha imi, tan imi la fiar Ida ne'ebé haruka Ha'u mai. ³⁹Imi lee Eskritura sira basa imi hanoin katak imi bele hetan moris rohan laek iha sira: sira mak fó sasin kona ba Ha'u. ⁴⁰Maibé imi lakohi mai hakbesik Ha'u atu imi hetan moris. ⁴¹Ha'u la buka gloria housi ema. ⁴²Maibé Ha'u hatene katak imi la iha domin ba Maromak. ⁴³Ha'u mai hodi Ha'u Aman nia naran, no imi lakohi simu Ha'u; ema seluk mai karik hodi nia naran rasik, imi sei simu nia. ⁴⁴Imi bele fiar oin sa, imi ne'ebé fó gloria ba malu, maibé la buka gloria ne'ebé mai deit housi Maromak? ⁴⁵Keta hanoin katak Ha'u mak sei duu imi ba Aman; Moises ne'ebé imi hein mak sei duu imi. ⁴⁶Imi fiar Moises karik, imi sei fiar mos Ha'u, tamba nia hakerek kona ba Ha'u. ⁴⁷Maibé, imi la fiar karik buat ne'ebé nia hakerek, oin sa mak imi bele fiar Ha'u nia liafuan?"

6

Jesus fó han ba ema rihun lima

¹Tuir mai, Jesus liu ba tasi Galileia, katak tasi Tiberiades, nia sorin balun. ²Ema lubun boot tuir Nia, tan sira hare milagre hirak ne'ebé Nia halo ba ema moras sira. ³Sa'e tiha ba foho ida, Jesus tur iha neba ho nia eskolante sira. ⁴Paskua, katak Judeu sira nia festa, besik dau-daun ona. ⁵Foti tiha matan, hodi hare katak ema lubun boot mai hasouru. Nia, Jesus dehan ba Filipe: "Ita bele sosa paun iha ne'ebé los atu fó han ema sira ne'e?" ⁶Jesus koalia nune'e atu koko nia, basa Nia hatene ona atu halo sa. ⁷Filipe hatan ba Nia: "Osai atus rua mos sei la to'o atu ema ida-ida simu paun baluk oan ida." ⁸Andre, Simao Pedro nia alin, hateten ba Jesus. ⁹"Iha ne'e, iha labarik oan ida ho paun fuan lima no ikan rua; maibé ne'e to'o oin sa los ema barak ne'e?" ¹⁰Jesus lia tun, dehan: "Haruka ema sira ne'e tur hotu." Iha fatin neba iha du'ut barak. Ema sira tur tiha hotu, mane deit to'o besik rihun lima. ¹¹Kaer tiha paun, Jesus fó agradece, hodi fahe ba ema sira ne'ebé tur iha neba; ho ikan sira Nia halo mos nune'e. Sira han to'o bosu. ¹²Hafoin Jesus hateten ba nia eskolante sira: "Imi ba halibur baluk oan sira ne'ebé resin atu la bele lakon." ¹³Sira halibur duni paun rahun sira ne'ebé sira ne'ebé han tiha husik, hodi hakonu luhu sanulu resin rua. ¹⁴Hare milagre ne'ebé Jesus halo, ema sira dehan ba malu: "Tebes, ida ne'e mak profeta ne'ebé atu mai iha mundu." ¹⁵Maibé, wainhira Nia hatene katak sira atu kaer Nia hodi foti Nia nudar liurai, Jesus subar an mesak hodi fila fali ba foho.

Jesus la'o iha be leten

¹⁶Wainhira loron monu ona, eskolante sira tun ba tasi. ¹⁷Sa'e tiha ba ro ida, sira hakur tasi atu ba Kafarnaum. Nakukun ona, maibé Jesus seidaok to'o hamutuk ho sira. ¹⁸Tasi sai boot tan anin hu'u maka'as. ¹⁹Wainhira ro dook ona besik kilometru haat, sira hare Jesus la'o iha be leten hakbesik ro. Sira tauk; ²⁰maibé Nia dehan ba sira: "Ha'u mak ne'e, keta tauk!" ²¹Sira haksolok atu simu Nia iha ro laran; ro to'o kedad rai ne'ebé sira ba.

²²Liu tiha loron ida, ema barak ne'ebé hela iha tasi sorin balun hare katak iha neba iha ro ida deit, no Jesus la sa'e hamutuk ho nia eskolante sira, maibé sira ne'e ba mesak deit. ²³Maibé, ro balun to'o housi Tiberiades, besik fatin ne'ebé ema sira han paun, wainhira Na'i fó agradece. ²⁴Hare katak Jesus ho nia eskolante sira la iha ona, ema sira sa'e ro hodi ba Kafarnaum atu buka Jesus.

Paun moris nian

²⁵Hetan tiha Nia iha tasi sorin balun ba, sira hateten ba Nia: "Mestre, wainhira mak Ita boot iha ne'e?" ²⁶Jesus hatan ba sira: "Tebes, tebes, Ha'u dehan ba imi: imi buka Ha'u la'os tan imi hare milagre sira, maibé tan imi han paun to'o bosu. ²⁷Keta serbisu atu hetan aihan ne'ebé mohu, maibé ba aihan ne'ebé hela ba moris rohan laek; aihan ne'ebé Oan Mane sei haraik ba imi, basa ba Nia mak Aman Maromak tau nia marka." ²⁸Rona tiha ne'e, sira hasa'e lia ba Nia dehan: "Ami sei halo sa los atu kaer Maromak nia serbisu?" ²⁹Jesus lia tun ba sira: "Maromak nia serbisu mak ida ne'e: imi fiar Ida ne'ebé Nia haruka mai." ³⁰Sira hasa'e lia ba Nia: "Sinal sa los mak Ita halo, atu ami hare hodi fiar Ita? Hahalok sa ida mak Ita halo." ³¹Iha rai fuik maran, ami nia bei-ala sira han mana, tuir Eskritura hateten: 'Nia fó han sira ho paun ne'ebé tun housi lalehan.' ³²Jesus hatan ba sira: "Tebes, tebes, Ha'u dehan ba imi katak la'os Moises mak fó ba imi paun housi lalehan; maibé Ha'u Aman mak fó ba imi paun los housi lalehan. ³³Basa Maromak nia aihan mak tun housi lalehan hodi fó moris ba mundu." ³⁴Sira dehan ba Nia: "Na'i, haraik nafatin aihan ne'e mai ami." ³⁵Jesus hatan ba sira: "Ha'u mak aihan moris nian. Ema ne'ebé hakbesik Ha'u sei la hamlaha tan; no ema ne'ebé fiar Ha'u sei la hamrook tan." ³⁶Maibé Ha'u dehan ona ba imi katak maski imi hare tiha Ha'u, imi la fiar. ³⁷Sira hotu ne'ebé Aman fó mai Ha'u, sei hakbesik Ha'u; no ida ne'ebé hakbesik Ha'u, Ha'u sei la duni sai. ³⁸Basa Ha'u mai housi lalehan la'os atu halo Ha'u nia hakarak, maibé atu halo tuir Ida ne'ebé haruka Ha'u mai nia hakarak. ³⁹No Ida ne'ebé haruka Ha'u mai nia hakarak mak ida ne'e: atu Ha'u keta lakon buat ne'ebé Nia fó tiha mai Ha'u, maibé atu Ha'u halo sira moris hi'as iha loron ikus. ⁴⁰Basa Ha'u nia Aman nia hakarak mak ida ne'e: katak ema ida-ida ne'ebé hare Oan hodi fiar Nia, ema ne'e sei hetan moris rohan laek; no Ha'u sei halo nia moris hi'as iha loron ikus."

⁴¹Ema Judeu sira mura-mura ba Jesus tamba Nia dehan: "Ha'u mak aihan ne'ebé tun housi lalehan." ⁴²Sira hateten: "Nia la'os Jesus, Jose nia Oan? Ita hatene Nia aman no inan. Nusa mak nia bele dehan, 'Ha'u mai housi lalehan?'" ⁴³Jesus hatan ba sira, dehan: "Imi keta mura-mura iha imi leet. ⁴⁴Ha'u Aman ne'ebé haruka Ha'u mai la dada nia karik, ema ida la bele hakbesik Ha'u; no Ha'u sei halo ema ne'e moris hi'as iha loron ikus. ⁴⁵Profeta sira hakerek nanis ona, dehan: 'Maromak sei hanorin sira hotu.' Ema hotu ne'ebé rona Aman hodi aprende housi Nia, ema ne'e hakbesik Ha'u. ⁴⁶Ema ida seidaok hare Aman. Ida ne'ebé mai housi Maromak, Nia deit mak hare ona Aman. ⁴⁷Tebes, tebes, Ha'u dehan ba imi: ema ne'ebé fiar hetan moris rohan laek. ⁴⁸Ha'u mak aihan moris nian. ⁴⁹Iha rai fuik maran imi nia bei-ala sira han mana, no sira mate ona. ⁵⁰Ida ne'e mak aihan ne'ebé tun housi lalehan, atu ema ne'ebé han aihan ne'e sei la mate. ⁵¹Ha'u mak aihan moris nian ne'ebé tun mai housi lalehan. Ema ne'ebé han aihan ne'e, nia moris ba nafatin; no aihan ne'ebé Ha'u sei fó mak Ha'u nia isin, saran ba mundu nia

moris.”⁵² Ema Judeu sira haksasuk malu, dehan: “Oin sa mak Nia bele fó nia isin mai ita atu han?”⁵³ Jesus hatan ba sira: “Tebes, tebes, Ha’u tebes ba imi: imi la han karik Oan Mane nia isin, imi la hemu karik nia ran, imi sei la hetan moris iha imi,”⁵⁴ Ema ne’ebé han Ha’u nia isin hemu Ha’u nia ran hetan moris rohan laek, no Ha’u sei halo nia moris hi’as iha loron ikus.⁵⁵ Basa Ha’u nia isin aihan duni, Ha’u nia ran tua duni.⁵⁶ Ema ne’ebé han Ha’u nia isin no hemu Ha’u nia ran horik iha Ha’u, no Ha’u horik iha nia.⁵⁷ Nudar Ha’u Aman ne’ebé moris haruka Ha’u mai, no Ha’u moris tamba Aman, nune’e mos ema ne’ebé han Ha’u, sei moris tamba Ha’u.⁵⁸ Ne’e mak aihan ne’ebé tun mai housi lalehan; la’os hanesan ida ne’ebé imi nia aman sira han, hafoin sira mate hotu; ema ne’ebé han aihan ne’e sei moris ba nafatin.”⁵⁹ Jesus hateten lia hirak ne’e iha sinagoga wainhira nia hanorin iha Kafarnaum.

⁶⁰Rona tiha ne’e eskolante barak dehan: “Liafuan hirak ne’e todan teb-tebes: se los mak bele rona?”⁶¹ Hatene katak nia eskolante mura-mura kona ba ne’e, Jesus hateten ba sira: “Liafuan hirak ne’e la monu los ba imi nia laran?”⁶³ Imi hare karik Oan Mane sa’e ba fatin ne’ebé uluk Nia horik ba, sei sa’e oin sa los?⁶³ Espiritu mak halo moris; isin la folin buat ida; liafuan ne’ebé Ha’u dehan ba imi mak espiritu no moris.⁶⁴ Maibé imi balun la fiar.” Basa Jesus hatene housi uluk kedas sira ne’ebé la fiar no se mak atu saran Nia ba mate.⁶⁵ Hafoin Nia dehan: “Tan ne’e mak Ha’u dehan ba imi katak ema ida la bele hakbesik mai Ha’u, wainhira Ha’u Aman dada nia.”⁶⁶ Ne’e hotu tiha, Jesus nia eskolante barak fila kotuk hodi la tuir tan ona Nia.⁶⁷ Tuir mai, Jesus lia tun ba sira na’in sanulu resin rua: “Imi mos hakarak ba ona?”⁶⁸ Simao Pedro hatan ba Nia: “Na’i, ami atu ba los ho se? Ita mak iha liafuan moris rohan laek nian.”⁶⁹ Ami fiar ona hodi hatene katak Ita mak Maromak nia Santu.”⁷⁰ Jesus hateten fali ba sira: “La’os Ha’u rasik mak fihir imi na’in sanulu resin rua? Maibé imi ida diabu?”⁷¹ Jesus koalita kona ba Judas, Simao Iscariotes nia Oan: basa nia, sira na’in sanulu resin rua ne’e ida, mak sei saran Nia ba mate.

7

Jesus sa’e ba Jerusalem hodi hanoin

¹Tuir mai, Jesus la’o iha Galileia; Nia la bele hela iha Judeia, basa Judeu sira hakarak oho Nia.² Festa Tabernakulu Judeu sira nian besik dau-daun ona.³ Nia maun-alin sira hateten ba Nia: “Husik fatin ne’e hodi ba rai Judeia atu o nia eskolante sira bele hare hahalok sira ne’ebé o halo.”⁴ Basa ema ida hakarak karik katak ema hotu hatene nia, nia la halo buat ida sub-subar deit. O halo ona buat sira ne’e, hatudu o nia an ba mundu!”⁵ Lo-los, Nia maun-alin sira mos la fiar Nia.⁶ Jesus hatan ba sira: “Ha’u nia tempu seidaok to’o, maibé ba imi nian iha nafatin.”⁷ Mundu la bele hakribi imi, maibé nia hakribi Ha’u tamba Ha’u fó sasin katak nia hahalok sira aat.⁸ Imi sa’e ba festa ba. Ha’u la ba basa Ha’u nia tempu seidaok to’o lo-los.”⁹ Koalita nune’e hotu tiha, Nia hela iha Galileia.¹⁰ Maibé wainhira Nia maun-alin ba tiha ona, Nia mos ba, maibé sub-subar deit.¹¹ Judeu sira buka Nia iha festa, dehan: “Nia iha ne’ebé?”¹² Ema barak haksasuk malu kona ba Nia. Balun dehan: “Nia ema diak,” sira seluk dehan: “Lae, Nia lori povu ba dalan sala.”¹³ Maibé ema ida la koalita mo-mos kona ba Nia tamba tauk Judeu sira.

¹⁴Iha ona festa klaran mak Jesus sa’e ba templu hodi hahu hanorin.¹⁵ Judeu sira hakfodak, dehan: “Nia la ba eskola, oin sa los Nia hetan matenek ne’e?”¹⁶ Jesus hatan ba sira: “Ha’u nia doutrina la’os Ha’u nian, maibé mai housi Ida ne’ebé haruka Ha’u mai.”¹⁷ Ema ne’ebé hakarak tuir Nia hakarak, nia sei hatene Ha’u nia doutrina mai housi Maromak ka Ha’u koalita housi Ha’u nia An.¹⁸ Ema ne’ebé koalita housi nia an, nia buka nia rasik nia gloria; maibé ema ne’ebé buka gloria ba ida ne’ebé haruka nia, ema ne’e los, la iha lia bosok iha nia.¹⁹ La’os Moises mak fó ukunfuan ba imi? Maibé imi ida la tuir ukunfuan! Tansa imi buka atu oho Ha’u?”²⁰ Sira hatan: “Diabu iha o nia laran! Se los mak buka atu oho o?”²¹ Jesus dehan teni: “Ha’u halo hahalok ida deit, no imi hotu hakfodak.”²² Moises fó ba imi sirkunsisaun, ne’ebé mai housi patriarka sira, la’os housi Moises, no imi halo sirkunsisaun iha loron Sabadu.²³ Ema ida simu karik sirkunsisaun iha loron Sabadu atu halo tuir Moises nia ukun fuan, tansa imi hirus Ha’u wainhira Ha’u halo ema nia isin tomak fali iha loron Sabadu?”²⁴ Imi keta tesi tuir buat ne’ebé bele hare, maibé tesi lia tuir justisa lo-los.”

Ema sira haksasuk malu kona ba Jesus mai housi ne’ebé

²⁵Iha Jerusalem ema balun hateten: “La’os ida ne’e mak ema buka atu oho?”²⁶ Maibé Nia koalita iha ema hotu nia oin, no sira la dehan buat ida ba Nia. Keta na’i ulun sira hatene ona lo-los katak Nia mak Kristu karik?”²⁷ Maibé ita hotu hatene ema ne’e mai housi ne’ebé; wainhira Messias to’o, ema la hatene Nia mai housi ne’ebé.”²⁸ Tuir mai, wainhira Nia hanorin iha templu, Jesus dehan ho lia maka’as: “Imi hatene Ha’u, imi hatene mos Ha’u mai housi ne’ebé? Maibé Ha’u la mai atu tuir Ha’u rasik nia hakarak. Maibé Ida ne’ebé haruka Ha’u mai, Nia los; no imi la hatene Nia;”²⁹ Ha’u hatene Nia, basa Ha’u mai housi Nia; Nia mak haruka Ha’u mai.”³⁰ Sira hakarak kaer Nia, maibé ema ida la tau liman ba Nia, basa nia oras seidaok to’o.

Jesus fó sai katak Nia sei fila hikis mai

³¹Maibé ema barak fiar Nia; sira dehan: “Wainhira Messias sei mai, Nia sei halo milagre barak fali ema ne’e nian?”³² Fariseu sira rona katak ema lubun boot koalita nune’e, no am’lulik boot no fariseu sira haruka guarda sira atu kaer Nia.³³ Tuir mai Jesus dehan: “Ha’u sei hela ho imi uitoan tan deit; hafoin Ha’u sei fila fali ba Ida ne’ebé haruka Ha’u mai,”³⁴ imi sei buka Ha’u, maibé imi sei la hetan Ha’u, tan imi la bele ba iha fatin ne’ebé Ha’u hela.”³⁵ Judeu sira hateten ba malu: “Nia sei ba ne’ebé, atu ita bele hetan Nia? Nia sei ba karik hamutuk ho ema gentiu sira ne’ebé namkari lemo rai, hodi hanorin sira?”³⁶ Nia liafuan hirak ne’e katak sa: “Imi sei buka Ha’u, maibé imi se la hetan Ha’u,” no “Imi la bele ba iha fatin ne’ebé Ha’u hela?”

Be ne’ebé fó moris

³⁷Iha loron ikus, loron boot festa nian, Jesus hamriik hodi hateten ho lia maka’as: “Ema ne’ebé hamrook, mai hakbesik Ha’u hodi hemu!”³⁸ Ema ne’ebé fiar Ha’u, nudar eskritura hateten tiha: ‘Housi nia fuan sei suli mota be moris nian.”³⁹ Nia dehan ne’e kona ba Espiritu ne’ebé sei haraik ba sira ne’ebé fiar Nia. Espiritu seidaok fó ba ema, tamba Jesus la dauk simu gloria.

Ema haksasuk malu kona ba Jesus

⁴⁰Wainhira sira rona liafuan hirak ne’e, balun dehan: “Ema ne’e Profeta los duni.”⁴¹ Balun dehan fali: “Nia mak Messias.” Maibé sira seluk hateten: “Messias bele mai housi Galileia?”⁴² Eskritura la dehan katak Kristu mak David nia bei-oan no mai housi Belem, David nia knua?”⁴³ Ne’e duni, sira haksasuk malu kona ba Nia.⁴⁴ Ema balun hakarak kaer Nia, maibé ema ida la tau liman ba Nia.⁴⁵ Guarda sira fila fali ba am’lulik boot no fariseu sira, ne’ebé dehan ba sira: “Tansa imi la lori Nia mai?”⁴⁶ Guarda sira nia na’i ulun hatan: “Ema ida seidaok koalita hanesan ema ne’e!”⁴⁷ Fariseu sira husu fali ba sira: “Nia lori tiha mos imi ba dalan sala?”⁴⁸ Na’i ulun eh fariseu ruma fiar Nia karik?”⁴⁹ Maibé ema lubun boot ne’e, ne’ebé la hatene ukunfuan hetan malisan ba!”⁵⁰ Sira ida naran Nicodemos, ne’ebé uluk ba koalita ho Nia, hateten ba sira:⁵¹ “Ita nia ukunfuan fó kastigu ba ema ida, wainhira seidaok rona nia, seidaok hatene nia di-diak?”⁵² Sira hatan, “O mos housi Galileia? Buka iha eskritura no o sei hare katak la iha profeta ne’ebé mai housi Galileia.”

⁵³Sira ida-ida fila ba uma.

8

Feto sala na’in

¹Maibé Jesus sa’e ba foho Oliveira.² Iha dader, Nia mosu fali iha templu. Povu tomak hakbesik Nia, no Jesus tur hodi hanorin sira.³ Eskriba no fariseu sira lori fetu ida ne’ebé ema toman halo sala ho mane seluk.⁴ Sira tau fetu ne’e iha klaran, hodi dehan ba Jesus: “Mestre, ema toman fetu ne’e halo sala ho mane seluk.”⁵ Tuir ukunfuan, Moises haruka ita atu tuda mate fetu sira hanesan ne’e. O dehan sa los?”⁶ Sira husu ne’e hodi koko Nia, atu sira bele hetan lia ruma hasouru Nia. Maibé Jesus hakru’uk, hodi hakerek iha rai ho nia liman fuan.⁷ Tan sira litik nafatin Nia, Jesus hamriik hodi dehan ba sira: “Imi ida ne’ebé sala la iha, nia mak tuda uluk fetu ne’e!”⁸ Hafoin Nia hakru’uk fali hodi hakerek iha rai.⁹ Rona tiha liafuan hirak ne’e, sira ida-ida sai dau-daun, hahu housi katuas sira. Ikus mai Jesus hela mesak ho fetu ne’ebé hamriik iha nia oin.¹⁰ Hodi foti matan, Jesus dehan ba nia: “Feto, sira hotu ba ne’ebé? Ema ida la tesi lia ba o?”¹¹ Nia hatan: “La iha, Na’i.” Jesus koalita fali hodi dehan ba nia: “Ha’u mos la tesi lia hasouru o; la’o ona ba, no keta sala tan.”

Jesus mak mundu nia naroman

¹²Jesus koalia hikas ba sira nune'e: "Ha'u mak mundu nia naroman. Ema ne'ebé tuir Ha'u, nia sei la la'o iha nakukun laran, maibé sei iha naroman moris nian." ¹³Fariseu sira dehan ba Nia: "O fó sasin ba o nia an; O nia sasin la los." ¹⁴Jesus hatan ba sira, dehan: "Maski Ha'u fó sasin kona ba Ha'u An, Ha'u nia sasin los, tamba Ha'u hatene Ha'u mai housi ne'ebé no Ha'u ba ne'ebé; maibé imi la hatene Ha'u mai housi ne'ebé no Ha'u ba ne'ebé. ¹⁵Imi tesi lia tuir isin nia hanoin. Ha'u la tesi lia kona ba ema ida ¹⁶Maibé, Ha'u tesi lia mos karik, Ha'u nia lia los, tamba Ha'u la hela mesak. Ha'u hela ho Ida ne'ebé haruka Ha'u mai. ¹⁷Iha imi nia ukunfuan hakerek katak ema na'in rua nia sasin los. ¹⁸Ha'u fó sasin kona ba Ha'u An; no Aman ne'ebé haruka Ha'u mai, Nia mos fó sasin kona ba Ha'u." ¹⁹Sira husu ba Nia: "O Nia Aman iha ne'ebé?" Jesus hatan: "Imi la hatene Ha'u, la hatene mos Ha'u Aman. Imi hatene Ha'u karik, imi sei hatene mos Ha'u Aman." ²⁰Jesus hateten liafuan hirak ne'e besik osan fatin, wainhira Nia hanorin dau-daun iha templu. Maibé ema ida la kaer Nia, basa nia oras seidaok to'o.

Jesus la'os housi mundu ne'e

²¹Jesus dehan fali ba sira: "Ha'u sei ba, imi sei buka Ha'u; maibé imi sei mate iha imi nia sala. Ba fatin ne'ebé Ha'u ba, imi la bele ba." ²²Judeu sira hateten ba malu: "Nia atu oho an karik, tan ne'e Nia dehan: 'Ba fatin ne'ebé Ha'u ba, imi la bele ba?'" ²³Jesus lia tun ba sira, dehan: "Imi mai housi kraik, Ha'u mai housi leten; imi mundu ne'e nian, Ha'u la'os mundu ne'e nian. ²⁴Ha'u dehan ba imi katak imi sei mate iha imi nia sala, basa imi la fiar karik katak Ha'u mak Nia, imi sei mate iha imi nia sala." ²⁵Sira husu ba Nia: "O se los?" Jesus hatan: "Ha'u hateten ona ba imi uluk kedas. ²⁶Ha'u sei iha buat barak atu koalia no tesi lia kona ba imi. Maibé ida ne'ebé haruka Ha'u mai, Nia los; no Ha'u fó sai ba mundu buat ne'ebé Ha'u rona housi Nia." ²⁷Sira la hatene katak Nia koalia ba sira kona ba Aman. ²⁸Ne'e duni, Jesus dehan: "Wainhira imi sei foti tiha Oan Mane, iha oras neba mak imi sei hatene katak Ha'u mak Nia, no katak Ha'u la halo buat ida hodi Ha'u rasik nia kbiit, maibé Ha'u koalia nune'e nudar Aman hanorin mai Ha'u. ²⁹Ida ne'ebé haruka Ha'u mai hela ho Ha'u; Nia la husik Ha'u mesak basa Ha'u halo nafatin buat ne'ebé fó kosolok ba Nia."

³⁰Jesus hateten buat sira ne'e, no ema barak fiar Nia.

Jesus ho Abraao

³¹Tuir mai Jesus dehan ba sira ne'ebé fiar iha Nia: "Imi hela nafatin karik iha Ha'u nia liafuan, imi sei sai Ha'u nia eskolante lo-los; ³²no imi sei hatene lialos, no lialos sei soi imi." ³³Sira hatan: "Ami Abraao nia oan; ami la dauk sai ema ida nia atan. Nusa mak o dehan: 'Imi sei hetan maksoin?'" ³⁴Jesus hatan ba sira: "Tebes, tebes, Ha'u dehan ba imi: ema ne'ebé halo sala, ema ne'e sala nia atan. ³⁵Atan la horik nafatin iha uma; Oan Mane mak horik nafatin iha uma. ³⁶Ne'e duni, Oan Mane soi imi karik, imi sei hetan maksoin duni. ³⁷Ha'u hatene katak imi Abraao nia oan; maibé imi hakarak oho Ha'u basa Ha'u nia liafuan la monu ba imi nia laran. ³⁸Ha'u koalia kona ba buat ne'ebé Ha'u hare iha Ha'u Aman; no imi fali halo buat ne'ebé imi rona housi imi nia aman." ³⁹Sira hatan ba Nia: "Ami nia aman mak Abraao." Jesus hatan, "Imi Abraao nia oan sira karik, imi sei halo buat ne'ebé nia halo, ⁴⁰maibé ohin imi hakarak oho Ha'u, ne'ebé fó sai ba imi lialos ne'ebé Ha'u rona housi Maromak. Abraao la halo buat ne'e! ⁴¹Imi halo dau-daun imi aman rasik nia hahalok." Sira dehan fali ba Nia: "Ami la moris tan sala foer: ida deit mak ami nia Aman, katak Maromak." ⁴²Jesus hatan: "Maromak mak imi nia Aman karik, imi sei hadomi Ha'u, basa Ha'u sai no mai housi Maromak. Ha'u la mai hodi Ha'u nia hakarak rasik, maibé Nia mak haruka Ha'u mai. ⁴³Tansa mak imi la komprende buat ne'ebé Ha'u hateten? Tamba imi la bele tahan atu rona Ha'u nia liafuan. ⁴⁴Tan diabu mak imi nia aman. imi hakarak tuir imi nia aman nia hakarak. Houri uluk kedas nia oho ema. Nia la hela iha lialos, basa la iha lialos iha nia. Wainhira nia bosok, nia fó sai buat ne'ebé tuir nia an nian, basa nia bosokten no lia bosok nia aman. ⁴⁵Maibé tan Ha'u hateten lialos ba imi, imi la fiar. ⁴⁶Imi ida ne'ebé mak bele dehan katak Ha'u sala? Ha'u hateten lialos karik ba imi tansa imi la fiar Ha'u? ⁴⁷Ema ne'ebé mai housi Maromak, rona Maromak nia liafuan; imi la rona sira tamba imi la mai housi Maromak." ⁴⁸Judeu sira hatan ba Nia: "Ami la koalia los wainhira ami dehan katak O ema Samaritanu ida no diabu iha O nia laran?" ⁴⁹Jesus hatan: "Ha'u diabu la iha, maibé Ha'u hahi Ha'u nia Aman, no imi la hamtauk Ha'u. ⁵⁰Ha'u la buka naran boot ba Ha'u An. Iha Ida seluk ne'ebé buka nia no Nia sei tesi lia. ⁵¹Tebes, tebes, Ha'u dehan ba imi: Ema ida halo tuir karik Ha'u nia liafuan, nia sei la mate tinan ba tinan." ⁵²Judeu sira hateten ba Nia: "Oras ne'e ami hatene katak O iha diabu. Abraao mate tiha ona, profeta sira mos mate ona; maibé O dehan: 'Ema ne'ebé halo tuir Ha'u nia liafuan, nia sei la mate tinan ba tinan.'" ⁵³O boot liu fali ami nia aman Abraao, ne'ebé mate ona? Profeta sira mos mate. O halo an sa los?" ⁵⁴Jesus hatan: "Ha'u fó gloria ba Ha'u nia an karik, Ha'u nia gloria la folin buat ida; Ha'u nia Aman mak fó gloria mai Ha'u. Nia ne'ebé imi bolu imi nia Maromak. ⁵⁵Maibé imi la hatene Nia, Ha'u mak hatene Nia. Ha'u dehan karik Ha'u la hatene Nia, Ha'u bosokten hanesan imi. Maibé Ha'u hatene Nia no Ha'u halo tuir nia liafuan. ⁵⁶Imi nia aman Abraao haksolok tan nia atu hare Ha'u nia loron; nia hare tiha ona hodi haksolok." ⁵⁷Judeu sira hateten ba Nia: "O seidaok tinan lima nulu, O hare ona Abraao?" ⁵⁸Jesus hatan ba sira: "Tebes, tebes, Ha'u dehan ba imi katak molok Abraao moris, Ha'u mak Ha'u." ⁵⁹Nune'e sira kaer fatuk atu tuda Nia, maibé Jesus la'o haksumik tiha, hodi sai housi templu.

Jesus bali ema matan delek

¹Jesus liu dau-daun, Nia hare ema ne'ebé matan delek houri moris mai. ²Eskolante sira husu ba Nia: "Na'i, se nia sala mak halo ema ne'e moris matan delek: nia sala ka nia aman sira nian?" ³Jesus hatan ba sira: "Nia la sala, nia aman inan sira mos la sala; maibé, ne'e atu Maromak nia hahalok sira mosu iha nia. ⁴Wainhira sei loron, Ha'u sei halo Ida ne'ebé haruka Ha'u mai nia serbisu; kalan to'o mai wainhira ema ida la bele serbisu. ⁵Wainhira Ha'u iha mundu, Ha'u mundu nia naroman." ⁶Dehan tiha ne'e, Nia tafui ba rai halo tahu ho nia kaben, hafoin nia kose tahu ne'e ba matan delek ne'e nia matan 'hodi dehan ba nia: "O ba fase iha pisina Siloe nian." Siloe katak "ida ne'ebé ema haruka." Ne'e duni, nia ba fase; hafoin nia fila, hodi hare ona. ⁸Ema sira ne'ebé hela besik nia, no sira hotu ne'ebé hare nia husu esmola, husu ba malu: "Ema ne'e la'os ida ne'ebé tur husu esmola?" ⁹Ema balun dehan: "Nia duni," seluk fali dehan: "La'os nia; ema ida hanesan nia!" Nia rasik dehan: "Ha'u duni!" ¹⁰Sira husu ba nia: "Oin sa mak o nia matan nakloke?" ¹¹Nia hatan: "Ema ida naran Jesus halo tahu, kose ha'u nia matan hodi dehan: 'Ba fase iha pisina Siloe.' Ha'u ba, fase tiha, no ha'u hare." ¹²Sira husu tan: "Nia iha ne'ebé?" Nia hatan: "Ha'u la hatene." ¹³Sira lori ema ne'ebé uluk matan delek ne'e ba fariseu sira. ¹⁴Loron ne'ebé Jesus halo tahu hodi loke nia matan ne'e, loron Sabadu ida. ¹⁵Fariseu sira husu ba nia oin sa nia hahu hare. Ema ne'e dehan ba sira: "Nia tau tahu ba ha'u nia matan, hafoin ha'u ba fase; oras ne'e ha'u hare." ¹⁶Fariseu balun dehan: "Ema ne'e la mai housi Maromak, basa nia la halo tuir Sabadu." Balun dehan: "Oin sa mak ema maksalak ida bele halo milagre ida hanesan ne'e?" Sira nia lia la tuir malu. ¹⁷Sira husu fali ba ema matan delek ne'e: "O dehan sa kona ba ema ne'ebé loke o nia matan?" Nia hatan: "Ema ne'e Profeta ida." ¹⁸Maibé Judeu sira la fiar katak ema ne'e uluk matan delek, hafoin hahu hare. Tan ne'e, sira bolu nia aman inan, ¹⁹hodi husu ba sira: "Ida ne'e mak imi nia oan ne'ebé imi dehan katak moris mai matan delek? Nusa mak oras nia bele hare?" ²⁰Nia aman inan hatan: "Ami hatene katak ida ne'e ami nia oan ne'ebé moris mai matan delek, ²¹maibé halo nusa mak oras ne'e nia hare, se mak loke nia matan, ne'e ami la hatene. Nia iha otas ona: imi husu nia ba, nia rasik sei koalia." ²²Nia aman inan koalia hanesan ne'e, tan sira tauk Judeu sira. Basa Judeu sira lia tuir malu ona katak ema ruma karik hateten katak Jesus mak Messias, sira sei duni sai nia housi sinagoga. ²³Tan ne'e, mak nia aman inan dehan: "Nia iha otas ona, imi husu nia ba."

²⁴Sira bolu ema ne'ebé uluk matan delek dala ida tan, hodi dehan ba nia: "O hahi Maromak ba! Ami hatene katak ema ne'e ema maksalak." ²⁵Nia hatan: "Nia ema maksalak ka lae, ha'u la hatene. Ha'u hatene deit katak, uluk ha'u matan delek, oras ne'e ha'u hare." ²⁶Sira husu ba nia: "Nia halo sa ida ba o? Oin sa mak nia loke o nia matan?" Nia hatan: "Ha'u dehan ona ba imi, imi la rona; tansa imi hakarak rona hikas? Imi mos hakarak sai nia eskolante, ka?" ²⁸Sira hateten ba nia: "O mak nia eskolante; ami Moises nia eskolante sira. ²⁹Ami hatene katak Maromak koalia ba Moises; maibé ida ne'e ami la hatene Nia mai housi ne'ebé!" ³⁰Ema ne'e dehan fali ba sira: "Ne'e mak halo ema hakfodak, katak imi la hatene Nia mai housi ne'ebé, maibé Nia loke ha'u nia matan. ³¹Ita hatene katak Maromak la rona ema maksalak sira, maibé Nia rona ema ne'ebé adora Maromak no halo tuir nia hakarak. ³²Houri uluk seidaok rona ema ida loke matan ba ema ne'ebé matan delek houri loron nia moris! ³³Nia la mai karik housi Maromak, Nia la bele halo buat ida." ³⁴Sira hatan: "O moris iha sala nia laran, o hakarak hanorin fali ami?" Hafoin sira duni sai nia.

³⁵Jesus rona katak sira duni sai nia; hetan tiha nia, Jesus dehan ba nia: "O fiar Oan Mane?" ³⁶Nia hatan: "Nia se los, Na'i, atu ha'u fiar nia?" ³⁷Jesus dehan: "O hare tiha ona Nia: Nia mak koalia dau-daun ho o." ³⁸Ema ne'e dehan: "Ha'u fiar, Na'i!" Hafoin nia hakneak iha Jesus nia futar oin, hodi adora Nia. ³⁹Jesus lia tun ba nia: "Ha'u mai iha mundu atu tesi lia, atu sira ne'ebé la hare bele hare, no sira ne'ebé hare, sira nia matan sai delek." ⁴⁰Rona liafuan hirak ne'e,

fariseu balun ne'ebé iha neba husu ba Nia: “Ne'e duni, ami mos matan delek?” ⁴¹Jesus hatan ba sira: “Imi matan delek karik, imi la sala. Maibé tamba imi dehan 'ami hare' mak imi nia sala hela nafatin.”

10

Bibi-atan diak

¹Tebes, Ha'u dehan ba imi: ida ne'ebé la tama ba bibi luhan housi lutu matan maibé tama housi fatin seluk, ema ne'e na'okten ida. ²Maibé ida ne'ebé tama housi lutu matan, nia mak bibi atan. ³Nia bolu bibi sira hodi sira nia naran, sira rona nia lia, hafoin nia lori sira ba liur. ⁴Hasai hotu tiha nia bibi sira, nia ba uluk; bibi sira tuir nia, tan sira hatene nia lia. ⁵Maibé bibi la tuir ema leet ida; sira halai housi nia, tan sira la hatene ema ne'e nia lia.”

⁶Ne'e mak aiknanoi ne'ebé Jesus hateten ba sira; maibé sira la komprende lo-los Jesus koalia kona ba sa. ⁷Ne'e duni Jesus dehan teni ba sira: “Tebes, tebes, Ha'u dehan ba imi: Ha'u mak bibi sira nia lutu matan. ⁸Ema hotu ne'ebé mai uluk liu Ha'u, mesak na'okten no ahu-na'in sira; bibi sira la rona sira nia lia. ⁹Ha'u mak lutu matan. Ida ne'ebé liu housi Ha'u sei hetan diak; nia sei tama, sei sai, hodi hetan du'ut matak. ¹⁰Ema na'okten mai atu na'ok, atu harahun deit. Ha'u mai atu ema hetan moris, hodi hetan moris ne'e wa'in liu tan. ¹¹Ha'u mak bibi atan diak. Bibi-atan diak saran nia moris ba nia bibi sira. ¹²Maibé ema ne'ebé la'os bibi atan, la'os bibi na'in, hare tiha asu fuik mai, nia halai hodi soe bibi sira, ne'ebé asu fuik kaer hodi halo namkari. ¹³Tan nia ema kontratu, la tau matan ba bibi sira. ¹⁴Ha'u mak bibi atan diak, Ha'u hatene Ha'u nia bibi sira, no Ha'u nia bibi sira hatene Ha'u. ¹⁵Nudar Aman hatene Ha'u, nune'e mos Ha'u hatene Aman; no Ha'u saran Ha'u nia moris ba Ha'u nia bibi sira. ¹⁶Ha'u sei iha tan bibi seluk ne'ebé seidak tama iha bibi luhan ida ne'e. Ha'u sei dada mos sira mai. Sira sei rona Ha'u nia lia, no sei iha bibi luhan ida deit ho bibi atan ida deit. ¹⁷Aman hadomi Ha'u tamba Ha'u saran Ha'u nia moris atu simu fali nia. ¹⁸Ema ida la hasai Ha'u nia moris housi Ha'u; hodi Ha'u rasik nia hakarak mak Ha'u saran moris ne'e. Ha'u iha kbiit atu saran Ha'u nia moris, no mos iha kbiit atu simu fali nia. Ida ne'e mak ukunfuan ne'ebé Ha'u simu housi Ha'u. ¹⁹Dala ida tan Judeu sira haksasuk malu tamba liafuan hirak ne'e. ²⁰Sira barak dehan: “Diabu iha nia laran, Nia bulak: tansa imi rona Nia?” ²¹Balun fali dehan: “Ema ne'ebé iha diabu iha nia laran la koalia hanesan ne'e, diabu bele loke karik matan delek nia matan?”

Jesus fó sai katak nia Maromak Oan. Judeu sira hakribi nia.

²²Iha Jerusalem sira halo dau-daun festa dedikasaan templu nian iha tempu malirin. ²³Iha templu, Jesus la'o iha portiku Salomao nian. ²⁴Judeu sira halibur hamutuk ho Nia hodi husu ba: “To'o wainhira O sei husik ami iha nakukun laran? O mak Kristu karik, hateten los keda mai ami.” ²⁵Jesus hatan ba sira: “Ha'u hateten ona ba imi, maibé imi la fiar. Hahalok sira ne'ebé Ha'u halo hodi Ha'u Aman nia naran fó sasin kona ba Ha'u, ²⁶maibé imi la fiar, basa imi la'os Ha'u nia bibi sira. ²⁷Ha'u nia bibi sira rona Ha'u nia lia; Ha'u hatene sira, no sira tuir Ha'u. ²⁸Ha'u fó ba sira moris rohan laek. Sira la lakon, no ema ida sei la bele hadau sira housi Ha'u nia liman. ²⁹Ha'u Aman, ne'ebé fó sira mai Ha'u, Nia boot liu ema hotu; no ema ida sei la bele hadau sira housi Aman nia liman. ³⁰Aman ho Ha'u ida deit.” ³¹Dala ida tan Judeu sira kaer fatuk atu tuda Jesus. ³²Nia dehan ba sira: “Ha'u hatudu ona ba imi hahalok diak barak ne'ebé mai housi Aman: tan hahalok ida ne'ebé mak imi tuda Ha'u?” ³³Judeu sira hatan ba Nia: “Ami la tuda o tamba hahalok diak ruma, maibé tamba o koalia aat Maromak; tamba maski o ema deit, o halo an Maromak.” ³⁴Jesus husu sira: “La hakerek iha imi nia eskritura, 'ha'u dehan, imi sira ne'e maromak'?” ³⁵Ne'e duni, eskritura hanaran 'maromak' ema sira ne'ebé Maromak nia liafuan to'o tiha, no ema ida la bele halakon eskritura, ³⁶maibé ba Ida ne'ebé Aman halo santu hodi haruka ba mundu, imi dehan 'O koalia aat Maromak; tamba Ha'u dehan 'Ha'u Maromak nia Oan'?” ³⁷Ha'u la halo karik Ha'u Aman nia hahalok, imi keta fiar Ha'u. ³⁸Maibé, Ha'u halo karik, maski imi lakohi fiar Ha'u, imi fiar Ha'u nia hahalok sira, atu imi bele hatene no komprende katak Aman hela iha Ha'u no Ha'u iha Aman.” ³⁹Tuir mai, sira buka atu kaer Jesus, maibé Nia halai housi sira nia liman. ⁴⁰Nia fila fali ba mota Jordao nia sorin balun, fatin iha ne'ebé uluk Joao sarani ema, hodi hela iha neba. ⁴¹Ema barak mai hakbesik Nia, dehan: “Tebes, Joao la halo sinal ida, maibé buat hotu ne'ebé Joao dehan kona ba ema ne'e, los duni.” ⁴²No ema barak iha neba fiar Nia.

11

Lazaro moris hi'as

¹Iha tempu neba, ema ida moras, naran Lazaro; nia ema Betania, knua ida Maria ho nia bin Marta nian. ²Maria ne'e, mak tau mina morin ba Na'i, hodi hamaran Jesus nia ain ho nia fuuk. Nia maun Lazaro mak moras. ³Nia feto sira haruka fó hatene ba Jesus: “Na'i, ida ne'ebé Ita hadomi moras.” ⁴Rona tiha ne'e, Jesus dehan: “Moras ne'e la'os atu mate; maibé atu fó gloria ba Maromak, hodi halo ema fó gloria ba Maromak Oan.” ⁵Jesus ho Marta, nia alin, no Lazaro, sira belun boot. ⁶Maibé, rona tiha katak Lazaro moras, Nia hela tan loron rua iha neba. ⁷Liu tiha ne'e, Nia dehan ba eskolante sira: “Ita ba fali Judeia.” ⁸Eskolante sira hateten Nia: “Mestre foin dau-daun Judeu sira buka atu tuda mate Ita, Ita sei hakarak fila fali ba neba?” ⁹Jesus hatan, dehan: “La'os loron ida iha oras sanulu resin rua? Ema ne'ebé la'o iha loron la sidi, basa hare naroman mundu ne'e nian; ¹⁰maibé nia la'o karik iha kalan, nia sidi, basa naroman la iha.” ¹¹Koalia tiha nune'e, Nia dehan tan: “Ita nia belun Lazaro toba; Ha'u ba atu fanu nia.” ¹²Eskolante sira dehan: “Na'i, nia toba karik, nia sei diak fali.” ¹³Jesus koalia kona Lazaro nia mate, maibé sira hanoin katak Jesus dehan Lazaro dukur deit. ¹⁴Tan ne'e, Jesus dehan sai mo-mos: “Lazaro mate tiha ona. ¹⁵Ha'u haksolok tamba Ha'u la iha neba atu imi bele fiar. Ita ba hare nia.” ¹⁶Tome, ida ne'ebé ema hanaran Kaduak, dehan ba nia maluk sira: “Ita mos ba atu mate hamutuk ho nia.” ¹⁷To'o tiha neba, Jesus hetan nia belun ema hako'i liu tiha loron haat. ¹⁸Betania besik Jerusalem kala kilometru tolu. ¹⁹Judeu barak ba hare Marta no Maria atu fó ksolok tamba sira nia maun mate. ²⁰Rona katak Jesus to'o dau-daun, Marta sai ba hasouru Nia. Maria tur hela iha uma. ²¹Marta dehan ba Jesus: “Na'i, Ita iha ne'e karik, Ha'u nia maun la mate! ²²Maibé oras ne'e mos Ha'u hatene katak Maromak sei haraik ba Ita buat ne'ebé Ita husu ba Nia.” ²³Jesus hatan ba nia: “O nia maun sei moris hi'as.” ²⁴Marta simu: “Ha'u hatene katak nia sei moris hi'as iha loron ikus.” ²⁵Jesus dehan teni ba nia: “Ha'u ne'e moris hi'as no moris. Ema ne'ebé fiar Ha'u, maski mate ona, nia sei moris. ²⁶Ema hotu ne'ebé moris hodi fiar Ha'u, nia sei la mate tan. O fiar lia ne'e?” ²⁷Marta dehan: “Ha'u fiar, Na'i; Ha'u fiar katak Ita mak Messias, Maromak Oan, ne'ebé atu mai iha mundu.” ²⁸Dehan tiha ne'e, Marta bolu nia alin Maria, hodi dehan sub-subar: “Mestre iha ne'e, Nia bolu o.” ²⁹Rona tiha ida ne'e, Maria hamriik keda hodi ba buka Jesus. ³⁰Jesus seidak tama iha knua; Nia sei hela iha fatin ne'ebé Marta hasouru Nia. ³¹Wainhira Judeu sira ne'ebé hamutuk ho Maria iha uma hodi fó ksolok hare nia hamriik no sai lalais, sira tuir nia, tan hanoin katak sira ba tanis iha rate. ³²To'o tiha iha fatin ne'ebé Jesus hela ba, hodi hare Nia, Maria monu ba Jesus nia ain, dehan: “Na'i, Ita iha ne'e karik, Ha'u nia maun la mate!” ³³Hare tiha nia tanis, no mos hare Judeu sira ne'ebé mai ho nia tanis hotu, Jesus nia laran taridu teb-tebes, neon susar, tan hanoin. ³⁴Hafoin Nia husu: “Imi tau nia iha ne'ebé?” Sira hatan: “Ita mai hare, Na'i.” ³⁵Jesus tanis. ³⁶Judeu sira dehan: “Hare ba oin sa Na'i hadomi nia!” ³⁷Maibé balun dehan fali: “Nia ne'ebé loke matan delek nia matan, la bele halo ema ne'e keta mate?” ³⁸Nia laran taridu dala ida tan, Jesus hakbesik ba rate. Rate ne'e, fatuk kuak ida ne'ebé taka hela ho fatuk boot ida. ³⁹Jesus dehan: “Imi hasai tiha fatuk.” Marta, matebian nia feton, hatan: “Iis ona, Na'i; loron hat ona.” ⁴⁰Jesus dehan: Ha'u la dehan ba o katak o fiar karik, o sei hare Maromak nia gloria?” ⁴¹Sira hasai fatuk. Jesus foti matan ba lalehan, dehan: “Aman, Ha'u fó agradeba ba Ita Boot tan Ita rona Ha'u.” ⁴²Ha'u hatene nanis ona katak Ita rona Ha'u nafatin; maibé Ha'u koalia nune'e tamba povu ne'ebé hale'u Ha'u, atu sira fiar katak Ita haruka Ha'u mai.” ⁴³Dehan tiha ne'e, Nia foti lia maka'as, dehan: “Lazaro, sai mai liur!” ⁴⁴Matebian sai mai ho liman no ain falun tiha ho hena. Nia oin taka ho lensol ida. Jesus dehan ba sira: “Kore tiha nia, hodi husik nia la'o ba.”

Na'i ulun sira futu lia atu oho Jesus

⁴⁵Hare tiha buat ne'ebé Jesus halo, Judeu barak ne'ebé ba hare Maria, fiar Nia, ⁴⁶maibé sira balun ba fó hatene ba fariseu sira buat ne'ebé Jesus foin halo. ⁴⁷Amlulik sira nia na'i ulun no fariseu sira halibur hamutuk hodi dehan: “Ita atu halo sa los tan ema ne'e halo milagre barak?” ⁴⁸Ita husik nia karik, ema hotu sei fiar Nia, hafoin Romano sira sei mai sobu rahun ita nia templu ho nasaun tomak.” ⁴⁹Maibé sira ida, naran Kaifas, am'lulik boot ba tinan neba, hateten ba sira: “Imi la hatene buat ida! ⁵⁰Imi la hatene katak, diak liu ba imi ema ida deit mak mate, liu fali povu tomak terus!” ⁵¹Nia la dehan ne'e tan nia an rasik, maibé tamba nia mak am'lulik boot iha tinan ne'e, nia si'ik katak Jesus sei mate tan nasaun ⁵²no la'os ba nasaun deit, maibé atu halibur hamutuk ho neon ida deit Maromak nia oan sira ne'ebé namkari lemo rai. ⁵³hahu housi loron ne'e, sira futu lia atu oho Nia. ⁵⁴Tan ne'e, Jesus la la'o ona iha Judeu sira nia leet. Nia husik rai ne'e ba sidade Efraim, besik rai fuik maran, hodi hela iha neba ho nia eskolante sira. ⁵⁵Paskua Judeu sira nian besik ona. Ema barak sa'e ba Jerusalem housi rai atu hamos an ba festa. ⁵⁶Sira buka Jesus hodi dehan ba malu: “Imi hanoin sa? Imi hanoin katak Nia sei mai iha festa?” ⁵⁷Am'lulik boot no fariseu sira fó ordem atu ema ne'ebé hatene Nia iha ne'ebé, fó hatene, atu sira bele kaer Nia.

Mina morin ba Jesus iha Betania

¹Loron neen molok festa Paskua, Jesus ba Betania. Lazaro ne'ebé Jesus halo moris hi'as housi mate horik iha neba. ²Sira fó han Jesus. Lazaro han hamutuk ho Nia. Marta serbi meja. ³Maria fali hola mina morin buli ida ho folin boot hodi fase no hamaran Jesus nia ain ho fuuk, to'o mina morin nia iis hamorin uma laran tomak. ⁴Eskolante sira ida, Judas Iscariotes. Simao nia oan, ida ne'ebé atu saran Nia ba mate. husu: ⁵“Tansa ita la fá'an mina morin ne'e ba denariu atus tolu, hodi fó osan ba ema kiak sira?” ⁶Nia hateten buat ne'e la'os tan hanoin kiak sira, maibé tamba nia na'okten ida; dala barak nia foti housi sira hotu nia osan. ne'ebé nia rai. ⁷Jesus dehan: “Husik nia halo nune'e, hodi hanoin loron atu hakoi Ha'u. ⁸basa kiak sira sei hela nafatin iha imi nia leet, maibé Ha'u sei la hela nafatin ho imi” ⁹Rona tiha katak Nia iha neba, Judeu barak mai, la'os deit tamba Jesus, maibé mos atu hare Lazaro, ne'ebé Nia halo moris hi'as housi mate. ¹⁰Amlulik boot sira futu lia atu oho mos Lazaro, ¹¹tamba hodi nia ema barak husik sira no fiar Jesus.

Jesus tama iha Jerusalem

¹²Liu tiha loron ida, ema lubun boot ne'ebé ba festa rona katak Jesus hakbesik dau-daun ba Jerusalem. ¹³Sira kaer ramos sanak sira no ba hasouru Nia, hodi haklalak: “Osana! Rahun diak ba Ida ne'ebé mai hodi Na'i nia naran, Israel nia Liurai!” ¹⁴Jesus hetan kuda burro oan ida hodi sa'e, nudar hakerek: ¹⁵“Keta tauk, Siao nia oan feto; hare ba, o nia liurai to'o mai, sa'e kuda burro oan ida.” ¹⁶Uluk eskolante sira la komprende buat ne'e; maibé wainhira Jesus simu ona gloria. mak sira hanoin fali katak ne'e hakerek tiha ona kona ba Nia. no katak sira halo tiha nune'e ba Nia. ¹⁷Ema barak ne'ebé hamutuk ho Jesus wainhira Nia bolu Lazaro sai housi rate hodi halo nia moris hi'as housi mate, fó sasin kona ba Nia. ¹⁸Ema barak ba hasouru Nia tan sira rona katak Nia halo milagre ne'e. ¹⁹Ne'e duni, fariseu sira hateten ba malu: “Hare ba, imi la bele halo buat ida; mundu tomak tuir Nia!”

Jesus fó sai kona ba nia mate

²⁰Sira ne'ebé ba adora iha loron festa, balun ema Gregu. ²¹Sira ne'e hakbesik ba Filipe, ida ne'ebé mai housi Betsaida iha Galileia, hodi dehan ba nia: “Na'i, ami hakarak hare Jesus.” ²²Filipe ba dehan ba Andre; hafoin Filipe ho Andre hato'o ba Jesus. ²³Jesus hatan ba sira dehan: “Loron to'o ona atu Oan Mane simu gloria. ²⁴Tebes, tebes, Ha'u dehan ba imi: trigu musan ne'ebé monu ba rai la mate karik, nia hela mesak; maibé mate karik, nia fó fulin barak. ²⁵Ema ne'ebé hadomi nia moris, sei lakon nia moris ne'e; ema ne'ebé hewai nia moris iha mundu ne'e sei rai hela nia ba moris rohan laek. ²⁶Ema ne'ebé serbi Ha'u, sei tuir Ha'u; no iha fatin ne'ebé Ha'u hela, Ha'u atan mos sei hela neba. Ema ne'ebé serbi Ha'u, Ha'u Aman sei hahi nia.”

²⁷“Oras ne'e Ha'u neon sala: Ha'u sei dehan los sa ida? ‘Aman, hadook tiha Ha'u housi oras ne'e?’ Lae; tan ne'e duni mak Ha'u mai to'o oras ne'e. ²⁸Aman hahi Ita naran!” Lia ida mai housi lalehan, dehan: “Ha'u hahi tiha ona Nia, no Ha'u sei hahi tan Nia!” ²⁹Ema lubun boot ne'ebé hamriik iha neba rona lia ne'e no sira dehan katak ne'e rai tarutu ida. Balun dehan: “Anju ida mak koalia ba Nia.” ³⁰Jesus hatan: “La'os tan Ha'u mak lia ne'e mosu, maibé tan imi. Ohin mak tesi lia ba mundu; ohin mos mak sei duni sai ona liurai mundu ne'e nian. ³²Wainhira ema foti Ha'u housi rai, Ha'u sei dada ema hot-hotu mai Ha'u.” ³³Nia koalia hanesan ne'e atu hatudu oin sa Nia sei mate. ³⁴Ema barak hateten fali ba Nia: “Ami rona housi eskritura katak Kristu sei hela ba nafatin; oin sa mak o dehan katak ema sei foti Oan Mane? Se los mak Oan Mane ne'e?” ³⁵Jesus hatan ba sira: “Naroman sei hela tan ho imi tempu uitoan deit. Imi la'o ba wainhira naroman sei hela ho imi keta nakukun ukun imi; basa ema ne'ebé la'o iha nakukun laran la hatene nia ba ne'ebé. ³⁶Wainhira naroman sei hela ho imi, imi fiar naroman ba, atu imi sai naroman nia oan sira.”

Koalia tiha nune'e, Jesus hadook An hodi subar housi sira.

Judeu sira la fiar Jesus

³⁷Maski Jesus halo milagre barak iha sira nia oin, sira la fiar Nia, ³⁸atu halo tuir Profeta Isaías nia liafuan ne'ebé dehan: “Na'i, se los mak fiar ami nia liafuan? Ba se los mak Na'i hatudu nia liman?” ³⁹Tan ne'e, sira la bele fiar, basa Isaías dehan: ⁴⁰“Nia halo tiha sira matan delek no laran tos, keta sira hare ho sira nia matan no hatene lo-los ho sira nia fuan, nune'e sira fila mai Ha'u hodi hetan isin diak.” ⁴¹Isaías koalia nune'e tan nia hare Nia gloria no koalia kona ba Nia. ⁴²Na'i ulun barak fiar Nia, maibé tan sira tauk fariseu sira, sira la fó sasin, keta ema duni sai sira housi sinagoga, ⁴³basa sira hadomi gloria housi ema liu fali gloria housi Maromak.

⁴⁴Jesus dehan tan ho lia maka'as: “Ema ne'ebé fiar Ha'u, la fiar Ha'u maibé ida ne'ebé haruka Ha'u mai. ⁴⁵No ema ne'ebé hare Ha'u, hare Ida ne'ebé haruka Ha'u mai. ⁴⁶Ha'u mai iha mundu nudar naroman, atu ema ne'ebé fiar Ha'u la bele hela iha nakukun laran. ⁴⁷Ema ida rona karik Ha'u nia liafuan maibé la halo tuir nia, Ha'u la tesi lia hasouru nia; basa Ha'u la mai atu tesi lia hasouru mundu, maibé atu soi mundu. ⁴⁸Ema ne'ebé hakribi Ha'u hodi la simu Ha'u nia liafuan, nia iha ona ida ne'ebé sei tesi lia hasouru nia: Ha'u nia liafuan mak sei tesi lia hasouru nia iha loron ikus. ⁴⁹Basa Ha'u la koalia hodi Ha'u nia kbiit rasik; maibé Aman ne'ebé haruka Ha'u mai, Nia mak haruka Ha'u atu koalia sa los, no atu dehan sa. ⁵⁰No Ha'u hatene katak Nia ukunfuan mak moris rohan laek. Ne'e duni, Ha'u koalia nudar Aman haruka Ha'u.”

13

Jesus fase eskolante sira nia ain

¹Molok tama ba festa Paskua, wainhira Jesus hatene ona katak Nia oras to'o ona atu husik mundu ne'e hodi liu ba Aman, no hadomi tiha nia doben sira ne'ebé hela iha mundu, Nia hadomi sira to'o rohan ²Sira sei han hela, diabu hatama tiha ba Judas Iscariotes nia ulun atu saran Jesus ba mate. ³Hatene tiha ona katak Aman saran tiha buat hotu iha Nia liman, no katak Nia mai housi Maromak no sei fila hikas ba Maromak, ⁴Jesus hamriik, kolu nia unik no hola hena mutin naruk ida hodi kesi ba nia knotak. ⁵Tuir mai, Nia tau be iha basia ida no hahu fase apostolu sira nia ain, hodi hamaran sira ho hena mutin bobar hela iha nia knotak. ⁶Nia to'o ba Simao Pedro ne'ebé dehan: “Na'i, Ita atu fase atan Ha'u nia ain?” ⁷Jesus hatan ba nia: “Oras ne'e o la bele komprende buat ne'ebé Ha'u halo dau-daun. Ikus mai o sei hatene.” ⁸Pedro simu: “Lae, ba nafatin Ita sei la fase ha'u nia ain!” Jesus dehan fali ba nia: “Ha'u la fase o nia ain karik, o sei la hela hamutuk ho Ha'u.” ⁹Simao Pedro hasa'e fali lia ba Jesus, dehan: “Ne'e sa, Na'i, fase ha'u ain; fase mos ha'u liman no oin.” ¹⁰Jesus lia tun hikas ba nia, dehan: “Ema ne'ebé haris tiha ona sei fase deit ain, tan nia isin mos ona. Imi mos tiha ona; maibé la'os imi hotu.” ¹¹Jesus hatene se los mak sei saran Nia ba mate; tan ne'e Nia dehan: “Imi mos ona maibé la'os imi hotu.” ¹²Fase hotu tiha sira nia ain, no hola tiha nia unik, Nia fila ba nia fatin. Jesus dehan ba sira: “Imi hatene Ha'u halo sa los ba imi? ¹³Imi bolu Ha'u Mestre no Na'i; imi los, Ha'u nune'e duni. ¹⁴Ne'e duni, Ha'u ne'ebé Na'i no Mestre fase karik imi nia ain, imi mos sei fase nia ain ba malu. ¹⁵Basa Ha'u fó esemplu ba imi, atu imi banati tuir nudar Ha'u foin halo ba imi. ¹⁶Tebes, tebes, Ha'u dehan ba imi: ‘Atan ida la sai boot liu fali nia na'i; nia la boot liu fali ida ne'ebé haruka nia.’ ¹⁷Imi hatene buat ne'e karik, rahun diak ba imi wainhira imi halo tuir. ¹⁸Ha'u la koalia kona ba imi hotu; Ha'u hatene Ha'u fihir se. Maibé eskritura ne'e sei sai los: ‘Ema ne'ebé han paun hamutuk ho Ha'u, foti ona nia ain tuban hasouru Ha'u.’ ¹⁹Ha'u dehan buat hirak ne'e keda ba imi, molok nia mosu atu wainhira buat ne'e mosu duni, imi bele fiar katak Ha'u mak Ha'u. ²⁰Tebes, tebes, Ha'u hateten ba imi: ema ne'ebé simu ida naran deit ne'ebé Ha'u haruka simu Ha'u; no ida ne'ebé simu Ha'u, simu Ida ne'ebé haruka Ha'u mai.”

Jesus fó sai kona ba Judas

²¹Dehan tiha ne'e hotu, Jesus nia laran taridu hodi fó sasin: “Tebes, tebes, Ha'u dehan ba imi katak imi ida sei saran Ha'u.” ²²Eskolante sira hateke ba malu hodi hanoin Nia koalia kona ba se los. ²³Eskolante ida ne'ebé Jesus hadomi tur besik nia sorin. ²⁴Ne'e duni, Simao Pedro halo sinal ida ba nia, dehan: “Husu to'ok , Nia dehan se los!” ²⁵Nia sader ba Jesus nia hirus matan hodi husu: “Se los, Na'i?” ²⁶Jesus hatan: “Nia mak ida ne'ebé Ha'u sei fó paun ne'ebé Ha'u sei habokon.” Hafoin, habokon tiha paun baluk ida, Nia fó ba Judas, Simao Iscariotes nia oan. ²⁷Paun simu tiha, diabu tama iha Judas nia laran. Jesus dehan ba nia: “Buat ne'ebé o atu halo, halo lalais ba!” ²⁸Sira ne'ebé tur iha meja la hatene tansa Jesus dehan nune'e ba nia. ²⁹Tamba Judas kaer kohe osan nian, sira balun hanoin katak Jesus dehan ba nia: “O ba sosa buat ne'ebé ita kuran ba festa;” eh haruka nia fó esmola ba ema kiak sira. ³⁰Simu tiha paun baluk ne'e, Judas sai keda. Kalan ona.

Ukunfuan foun

³¹Judas sai tiha, Jesus dehan: “Ohin Oan Mane simu gloria, no Maromak sei simu gloria iha Nia. ³²Maromak simu karik gloria iha Oan Mane, Maromak mos sei fó gloria ba Nia iha Nia An rasik no sei fó gloria kedas ba Nia. ³³Kosok oan sira, tempu utoan deit ona mak Ha'u sei hela ho imi. Imi sei buka Ha'u, no hanesan Ha'u dehan ona ba Judeu sira, ohin Ha'u dehan ba imi: ‘Ba fatin ne'ebé Ha'u sei ba, imi la bele ba.’ ³⁴Ha'u fó ba imi ukunfuan foun: imi sei hadomi malu; nudar Ha'u hadomi imi, nune'e mos imi sei hadomi malu. ³⁵Nune'e mak ema hotu sei hatene katak imi Ha'u nia eskolante sira: wainhira imi hadomi malu.”

³⁶Simao Pedro dehan ba Jesus: “Na'i, Ita ba ne'ebé?” Jesus hatan: “Ohin o la bele tuir Ha'u ba fatin ne'ebé Ha'u ba, maibé o sei tuir aban bainrua.”

³⁷Pedro simu dehan: “Na'i, tansa ha'u la bele tuir Ita ohin? Ha'u sei saran ha'u nia moris tamba Ita!” ³⁸Jesus lia tun fali ba nia: “O sei saran o nia moris tamba Ha'u? Tebes, tebes, Ha'u dehan ba o katak molok manu kokorek, o sei heli Ha'u dala tolu.”

14

Jesus ba hadia fatin ba nia eskolante sira

¹⁴Imi laran keta taridu resin. Imi fiar Maromak, fiar mos Ha'u. ²Iha Ha'u Aman nia uma iha fatin wa'in. Lae karik, Ha'u la dehan ba imi, ‘Ha'u ba hadia fatin ba imi.’ ³Wainhira Ha'u ba ona hodi hadia fatin ba imi, Ha'u sei fila hikas mai hodi lori imi ho Ha'u; nune'e, iha fatin ne'ebé Ha'u hela, imi mos sei iha neba ba. ⁴Ba fatin ne'ebé Ha'u atu ba, imi hatene ona dalan.” ⁵Tome dehan ba Nia: “Na'i, ami la hatene Ita ba los ne'ebé; oin sa ami bele hatene dalan?” ⁶Jesus hateten ba nia: “Ha'u ne'e dalan, lialos no moris. Ema ida la liu karik housi Ha'u, nia la bele hakbesik Ha'u Aman. ⁷Imi hatene ona Ha'u karik, imi hatene ona mos Ha'u Aman. Houri ohin ba oin, imi hatene ona Nia, no imi hare ona Nia.” ⁸Filipe husu ba Nia: “Na'i, hatudu Aman mai ami; ne'e to'o ona mai ami.” Jesus dehan ba nia: ⁹“Ha'u hela kleur ona ho imi, Filipe, imi seidaik hatene Ha'u? Ema ne'ebé hare ona Ha'u, hare ona mos Ha'u Aman. Nusa mak o dehan, ‘Hatudu Aman mai ami?’” ¹⁰Imi la fiar katak Ha'u hela iha Aman no Aman hela iha Ha'u? Liafuan hirak ne'ebé Ha'u dehan ba imi, Ha'u la dehan hodi Ha'u an rasik. Ha'u Aman, ne'ebé hela iha Ha'u, mak halo Nia hahalok. ¹¹Fiar Ha'u katak hela iha Aman, no Aman hela iha Ha'u. Lae karik, fiar Ha'u tamba hahalok hirak ne'e. ¹²Tebes, tebes, Ha'u dehan ba imi: ema ne'ebé fiar iha Ha'u sei halo mos hahalok sira ne'ebé Ha'u halo; nia sei halo hahalok boot liu fali hirak ne'e, tan Ha'u ba Aman. ¹³Buat ne'ebé imi husu hodi Ha'u nia naran, Ha'u sei halo, atu Aman hetan gloria iha Oan; ¹⁴imi husu karik buat ida hodi Ha'u nia naran, Ha'u sei halo.”

¹⁵“Imi hadomi Ha'u karik, imi sei halo tuir Ha'u nia ukunfuan sira. ¹⁶Ha'u sei harohan ba Aman; no Nia sei fó ba imi Mahein seluk ida, atu hela nafatin ho imi. ¹⁷Nia mak Espiritu lialos nian, ne'ebé mundu la bele simu, basa la hare Nia no la hatene Nia. Imi hatene Nia, tan Nia hela ho imi, no iha imi laran. ¹⁸Ha'u sei la husik imi oan kiak; Ha'u sei fila fali ba imi. ¹⁹Uitoan tan, mundu sei la hare ona Ha'u; maibé imi sei hare Ha'u; basa Ha'u moris no imi mos sei moris. ²⁰Iha laron neba, imi sei hatene katak Ha'u hela iha Aman, no imi iha Ha'u, no Ha'u iha imi. ²¹Ema ne'ebé simu hodi halo tuir Ha'u nia ukunfuan, nia mak hadomi Ha'u; no ema ne'ebé hadomi Ha'u, Ha'u Aman sei hadomi nia; no Ha'u sei hadomi nia hodi hatudu Ha'u An ba nia.” ²²Judas, la'os Iscariotes, hateten ba Nia: “Na'i, tansa ita atu hatudu An ba ami, la'os ba mundu?” ²³Jesus hatan ba nia: “Ema ne'ebé hadomi Ha'u sei simu Ha'u liafuan, no Ha'u Aman sei hadomi nia; Ami sei mai iha nia, hodi horik ho nia. ²⁴Ema ne'ebé la hadomi Ha'u la simu Ha'u nia liafuan; no liafuan ne'ebé imi rona dau-daun la'os Ha'u nian, maibé mai housi Aman ne'ebé haruka Ha'u mai.”

²⁵“Ha'u hateten lia hirak ne'e wainhira Ha'u sei hela iha imi nia leet; ²⁶maibé ksolok Na'in, katak Espiritu Santu, ne'ebé Aman sei haruka mai hodi Ha'u nia naran, sei hanorin imi buat hot-hotu, hodi halo imi hanoin fali buat tomak ne'ebé Ha'u hateten ona ba imi. ²⁷Dame Ha'u husik ba imi, Ha'u nia dame Ha'u fó ba imi; la'os hanesan mundu fó mak Ha'u fó ba imi. Imi keta laran susar, keta tauk. ²⁸Imi rona Ha'u hateten ona ba imi: ‘Ha'u ba ona, no Ha'u sei fila fali ba imi.’ Imi hadomi tiha Ha'u karik, imi sei haksolok tan Ha'u ba Ha'u Aman, basa Aman boot liu Ha'u. ²⁹Ha'u hateten sai kedas buat ne'e ba imi molok nia mosu, atu wainhira nia mosu, imi fiar. ³⁰Ha'u sei la koalía buat barak tan ho imi, basa ukun na'in mundu ne'e nian mai dau-daun ona. Nia la iha kbiit atu ukun Ha'u; ³¹Maibé Ha'u halo buat ne'ebé Aman haruka atu mundu bele hatene katak Ha'u hadomi Aman. Hamriik ba, Ita ba ona!”

15

Jesus mak uvas hun lo-los

¹⁴Ha'u mak uvas hun lo-los, Ha'u Aman mak to'os na'in. ²Sanak hotu ne'ebé la fó fuan, Nia hasai, no sanak ne'ebé fó fuan Nia hamos di-diak atu fó fuan liu tan. ³Imi mos ona tamba liafuan ne'ebé Ha'u hatene ona ba imi. ⁴Imi hela iha Ha'u, no Ha'u iha imi. Nudar uvas sanak, haketak housi hun, la bele fó fuan mesa-mesak, nune'e mos imi wainhira imi la hela iha Ha'u. ⁵Ha'u mak hun, imi sanak sira; ema ne'ebé hela iha Ha'u no Ha'u iha nia, ema ne'e mak fó fuan barak; basa ketak housi Ha'u, imi la bele halo buat ida. ⁶Ema la horik iha Ha'u karik, ema sei haketak nia hanesan ai-sanak hodi sai maran; ema futu hamutuk ai-sanak sira ne'e hodi soe ba ahi, no ahi sei han sira. ⁷Maibé imi hela iha Ha'u karik, no Ha'u nia liafuan hela iha imi, imi husu buat naran deit no sei halo duni ba imi. ⁸Ha'u Aman hetan gloria nune'e: katak imi fó fuan barak hodi hatudu katak imi Ha'u nia eskolante sira. ⁹Nudar Aman hadomi Ha'u, nune'e mos Ha'u hadomi imi; hela iha Ha'u nia domin ba. ¹⁰Imi halo tuir Ha'u nia ukunfuan sira karik, imi sei hela iha Ha'u nia domin; nudar Ha'u mos halo tuir Ha'u Aman nia ukunfuan sira no hela iha nia domin.”

Domin boot liu hotu

¹¹“Ha'u dehan sai lia hirak ne'e ba imi atu Ha'u nia ksolok hela iha imi no imi nia ksolok sai lo-los. ¹²Ha'u nia ukunfuan mak ida ne'e: imi hadomi malu nudar Ha'u hadomi imi. ¹³Ema ida la bele hadomi liu fali ema ne'ebé saran nia moris tan nia belun sira. ¹⁴Imi Ha'u nia belun sira wainhira imi halo tuir ne'ebé Ha'u haruka ba imi. ¹⁵Ha'u la bolu ona imi atan, basa atan la hatene nia na'in halo sa; maibé Ha'u bolu imi belun, tan Ha'u fó hatene ona ba imi lia hotu ne'ebé Ha'u rona housi Aman. ¹⁶La'os imi mak fihir Ha'u, maibé Ha'u mak fihir imi, hodi haruka imi ba atu ba fó fuan, no imi nia fuan hela ba nafatin, nune'e buat hotu ne'ebé imi husu ba Aman hodi Ha'u naran, Nia sei haraik ba imi. ¹⁷Ha'u haruka imi: hadomi malu.”

Mundu hakribi Jesus no eskolante sira

¹⁸“Mundu odi imi karik, imi hatene ba katak nia odi Ha'u uluk liu imi. ¹⁹Imi housi mundu ne'e karik, mundu sei hadomi imi nudar ninia an rasik; maibé, tan imi la'os housi mundu, basa Ha'u fihir ona imi housi mundu, tan ne'e mak mundu odi imi. ²⁰Imi hanoin fali lia hirak ne'ebé Ha'u hateten ona ba imi: ‘Atan ida la'os boot liu nia na'in.’ Sira fó terus Ha'u karik, sira sei fó terus ba imi; sira simu karik Ha'u nia liafuan, sira sei simu mos imi nian. ²¹Maibé sira sei halo buat ne'e hotu ba imi hodi Ha'u nia naran, basa sira la hatene Ida ne'ebé haruka Ha'u mai. ²²Ha'u la mai karik hodi koalía ba sira, sira sei la iha sala; maibé oras ne'e sira la bele heli sira nia sala. ²³Ema ne'ebé odi Ha'u, odi mos Ha'u Aman. ²⁴Ha'u la halo tiha ona karik iha sira nia leet hahalok sira ne'ebé ema seluk la dauk halo, sira sei la iha sala; maibé ohin ne'e, sira hare ona no sira odi Ha'u no Ha'u Aman. ²⁵Ne'e hotu mosu atu halo tuir lia hirak ne'ebé hakerek ona iha sira nia eskritura: ‘Sira odi Ha'u la ho lia hun ida.’ ²⁶Maibé wainhira Ksolok Na'in mai, ne'ebé Ha'u sei haruka mai housi Aman, katak Espiritu lialos nian ne'ebé mai housi Aman, Nia sei fó sasin kona ba Ha'u; ²⁷imi mos sei fó sasin, basa housi uluk kedas imi hamutuk ho Ha'u.”

16

¹⁴Ha'u fó hatene ona buat hirak ne'e ba imi atu imi keta monu. ²Sira sei duni sai imi housi sinagoga sira; lo-los, oras sei to'o mai wainhira ema ne'ebé oho imi sei hanoin katak nia serbi Maromak. ³Sira sei halo nune'e tamba sira la hatene Aman, la hatene mos Ha'u. ⁴Maibé Ha'u dehan tiha buat hirak ne'e ba imi atu wainhira oras to'o ona, imi bele hanoin fali katak Ha'u hateten ona kona ba sira ne'e ba imi. Ha'u la dehan buat sira ne'e ba imi housi uluk kedas basa iha tempo neba Ha'u sei hela ho imi.”

Espiritu Santu sei mai

⁵⁴Ha'u atu ba ona ba Ida ne'ebé haruka Ha'u mai, no imi ida la husu Ha'u: ‘Ita ba ne'ebé?’ ⁶Maibé, tan Ha'u dehan buat hirak ne'e ba imi mak imi neon sala. ⁷Maibé Ha'u dehan lialos ba imi: diak liu ba imi katak Ha'u ba, basa Ha'u la ba karik, Ksolok Na'in sei la mai iha imi; maibé Ha'u ba karik, Ha'u sei haruka

Nia ba imi. ⁸No wainhira Nia mai, Nia sei hatudu ba mundu kona ba sala, kona ba moris los no kona ba tesi lia. ⁹Kona ba sala, tan sira la fiar Ha'u; ¹⁰Kona ba moris los, basa Ha'u ba Ha'u Aman no imi sei la hare Ha'u ona; ¹¹kona ba tesi lia, tamba sei tesi lia ona hasouru ukun na'in mundu ne'e nian."

¹²"Ha'u sei iha tan buat barak atu hateten ba imi, maibé oras ne'e imi la bele simu hotu. ¹³Wainhira Espiritu lialos nian mai, Nia sei hanorin lialos tomak ba imi; basa Nia sei la koalio hodi nia naran rasik, maibé sei hateten buat ne'ebé Nia rona, hodi fó sai ba imi buat ne'ebé sei mosu aban bainrua. ¹⁴Nia sei fó gloria mai Ha'u, basa nia sei simu buat ne'ebé Ha'u nian no sei fó hatene ba imi. ¹⁵Ha'u Aman nia sasan tomak, Ha'u nian mós; tan ne'e mak Ha'u dehan katak Nia simu buat ne'ebé Ha'u nian hodi fó hatene ba imi."

Terus uluk liu fali ksolok

¹⁶"Uitoan tan, imi sei la hare ona Ha'u; hafoin, uitoan tan, imi sei hare fali Ha'u." ¹⁷Tuir mai nia eskolante balun hateten ba malu: "Lia ne'ebé Nia dehan mai ita ne'e katak sa, 'Uitoan tan, imi sei hare ona Ha'u, hafoin uitoan tan imi sei hare fali Ha'u' no mos, 'Ha'u atu ba Ha'u Aman'?" ¹⁸Sira dehan, 'Uitoan tan' ne'e katak sa? Ita la hatene Nia dehan katak sa." ¹⁹Jesus hatene kedas katak sira hakarak husu ba Nia, tan ne'e Nia dehan: "Imi husu ba malu kona ba ne'e: 'Uitoan tan imi sei la hare ona Ha'u; hafoin uitoan tan imi sei hare fali Ha'u'?" ²⁰Tebes, tebes, Ha'u dehan ba imi katak imi sei tanis no laran susar, maibé mundu sei haksolok; imi sei sai neon sala, maibé imi nia neon sala sei nakfila ba ksolok. ²¹Wainhira fetu ida atu tur ahi, nia neon sala basa nia oras to'o ona; maibé, tur ahi hotu tiha, nia haluha ona nia terus hodi haksolok tamba ema ida moris ona ba mundu. ²²Nune'e mos, oras ne'e imi neon sala; maibé Ha'u sei hare fali imi, no imi nia fuan sei haksolok, no ema ida la bele hasai housi imi ksolok ne'ebé imi hetan. ²³Iha loran ne'e, imi sei la husu Ha'u buat ida tan. Tebes, tebes, Ha'u dehan ba imi, imi husu buat naran deit ba Aman, Nia sei haraik ba imi hodi Ha'u nia naran. ²⁴Too ohin imi la dauk husu buat ida hodi Ha'u nia naran. Husu ba; imi sei simu, atu imi nia ksolok sei sai lo-los."

²⁵"Ha'u hateten ona buat hirak ne'e ba imi ho aiknanoi sira, oras sei mai wainhira Ha'u sei la koalio tan ho aiknanoi sira, maibé Ha'u sei hateten mo-mos ba imi kona ba Aman. ²⁶Iha loran neba, imi sei husu hodi Ha'u nia naran; no Ha'u la dehan katak Ha'u sei harohan ba Aman tamba ba imi, ²⁷basa Aman rasik hadomi imi, tamba imi hadomi tiha Ha'u hodi fiar katak Ha'u mai housi Aman. ²⁸Ha'u mai housi Aman hodi mai iha mundu; Ha'u atu husik fali mundu hodi fila ba Aman."

²⁹Eskolante sira dehan: "Oras ne'e Ita koalio mo-mos, la'os tan ho aiknanoi." ³⁰Oras ne'e ami hare katak Ita hatene buat hotu, no la presisa ema atu husu Ita. Tan ne'e ami fiar katak Ita mai housi Maromak." ³¹Jesus hatan: "Imi fiar ona, ka?" ³²Oras sei to'o mai, lo-los mai tiha ona, wainhira imi sei namkari, ida-ida ba nia uma, no husik Ha'u mesak; maibé Ha'u sei la mesak, basa Aman hamutuk ho Ha'u. ³³Hau fó hatene buat ne'e ba imi atu imi hetan dame. Iha mundu imi sei hetan susar barak; maibé imi haksolok ba, basa Ha'u manan tiha mundu."

17

Jesus nia orasaun

¹Dehan tiha liafuan hirak ne'e, Jesus foti matan ba lalehan, dehan: "Aman, oras to'o ona. Fó gloria ba ita Oan, atu ita Oan bele fó gloria ba Ita; ²atu nune'e, basa Ita fó ona ba Nia kbiit atu ukun ema tomak, atu fó moris rohan laek ba sira hotu ne'ebé Ita tau iha nia liman. ³Ne'e mak moris rohan laek: hatene Ita nudar Maromak los mesak deit, no Jesus Kristu ne'ebé Ita haruka mai." ⁴Ha'u hahi ona Ita iha rai, hodi halo to'o rohan serbisu ne'ebé Ita haruka Ha'u atu halo. ⁵Aman, oras ne'e hahi fali Ha'u ho gloria ne'ebé Ha'u iha uluk ho Ita, molok mundu mosu mai." ⁶Ha'u haklaken tiha Ita naran ba ema sira ne'ebé Ita haraik mai Ha'u housi mundu. Sira Ita nian, no Ita fó sira mai Ha'u; sira simu ona Ita nia liafuan. ⁷Oras ne'e sira hatene katak buat hotu ne'ebé Ita fó mai Ha'u, mai housi Ita, ⁸basa Ha'u haklaken tiha ba sira lia hirak ne'ebé Ita fó mai Ha'u. Sira simu ona lia hirak ne'e no hatene mo-mos katak Ha'u mai housi Ita, hodi fiar katak Ita mak haruka Ha'u mai. ⁹Ha'u harohan ba sira; Ha'u la harohan ba mundu, maibé ba sira ne'ebé Ita haraik mai Ha'u, basa sira Ita nian. ¹⁰Buat hotu ne'ebé Ha'u nian, Ita nian; no buat ne'ebé Ita nian, Ha'u nian mos. No Ha'u hetan gloria iha sira. ¹¹Ohin Ha'u la hela ona iha mundu, maibé sira sei hela iha mundu, no Ha'u ba hasouru Ita. Aman Santu, tau matan ba sira iha Ita naran. ne'ebé ita haraik mai Ha'u, atu sira sai ida deit, nudar Ita ho Ha'u ida deit. ¹²Wainhira Ha'u sei hela ho sira, Ha'u rasik tau matan ba sira iha Ita naran. Ha'u tau matan di-diak ba sira ne'ebé Ita haraik mai Ha'u. Ha'u tahan di-diak sira, atu sira ida la lakon; lakon deit mak lakon an nia oan, atu eskritura sai tuir lo-los. ¹³Maibé oras ne'e Ha'u atu fila ba Ita, no Ha'u dehan sai buat hirak ne'e iha mundu atu sira hetan Ha'u nia ksolok to'o sai lo-los. ¹⁴Ha'u fó hatene ona ba sira ita nia liafuan, no mundu odi sira, basa sira la'os mundu ne'e nian, nudar Ha'u mos la'os mundu ne'e nian. ¹⁵Ha'u la husu atu Ita hasai sira housi mundu, maibé atu Ita hadook sira housi Aat Na'in. ¹⁶Sira la'os mundu ne'e nian, nudar Ha'u mos la'os mundu ne'e nian. ¹⁷Halo sira santu iha lialos. Ita nia liafuan mak lialos. ¹⁸Nudar Ita haruka Ha'u mai iha mundu, nune'e mos Ha'u haruka sira ba mundu. ¹⁹No tamba sira mak Ha'u halo An santu, atu sira mos bele sai santu iha lialos."

²⁰"Ha'u la harohan deit ba sira ne'e, maibé mos ba sira ne'ebé sei fiar Ha'u tan sira ne'e nia liafuan; ²¹atu sira hotu sai ida deit, Ita, Aman, horik iha Ha'u, no Ha'u iha Ita; atu sira mos hela iha Ita Na'in rua, nune'e mundu bele fiar katak Ita mak haruka Ha'u mai. ²²Ha'u fó ona ba sira gloria ne'ebé Ita fó mai Ha'u, atu sira sai ida deit, nudar Ita Na'in rua ida deit. ²³Ha'u iha sira, no Ita iha Ha'u; atu sira laran ida deit teb-tebes, nune'e mak mundu sei hatene katak Ita mak haruka Ha'u mai, no mos katak Ita hadomi sira nudar Ita hadomi Ha'u. ²⁴Aman, Ha'u hakarak katak sira mos ne'ebé Ita fó mai Ha'u, hela hamutuk ho Ha'u iha fatin ne'ebé Ha'u iha hela; atu sira bele hare Ha'u nia gloria ne'ebé Ita fó tiha mai Ha'u tan Ita hadomi Ha'u molok mundu hahu. ²⁵Aman Santu, mundu ne'e la hatene Ita; maibé sira ne'e hatene katak Ita mak haruka Ha'u mai. ²⁶Ha'u fó hatene tiha ba sira Ita nia naran, no Ha'u sei fó hatene liu tan, atu domin ne'ebé Ita hadomi Ha'u bele hela iha sira, no Ha'u hela iha sira."

18

Sira kaer Jesus

¹Dehan tiha liafuan hirak ne'e, Jesus ho nia eskolante sira hakat liu ba rai klean Sedron. Sira tama iha to'os ida iha neba. ²Judas, ida ne'ebé atu saran Nia ba mate, hatene mos fatin ne'e, basa dala barak ona Jesus halibur hamutuk ho nia eskolante sira iha neba. ³Ne'e duni, Judas ba neba ho soldadu lubun ida, guarda balun no na'i ulun housi am'lulik boot no fariseu sira, ho ahi oan no kroat. ⁴Hatene tiha buat hotu ne'ebé sei mosu ba Nia, Jesus ba hasouru sira hodi dehan: "Imi buka se?" ⁵Sira hatan ba Nia: "Ami buka Jesus Nazare." Nia simu: "Ha'u mak ne'e." Judas, ne'ebé atu saran Nia ba mate, nia mos hamutuk ho sira. ⁶Wainhira Jesus dehan 'Ha'u mak ne'e', sira hakiduk hodi monu ba rai. ⁷Dala ida tan, Jesus husu ba sira, dehan: "Imi buka se?" Sira hatan: "Jesus Nazare." ⁸Jesus simu hikas; "Ha'u hateten ona ba imi katak Ha'u mak ne'e; ne'e duni, imi buka Ha'u karik, husik sira ne'e la'o ba." ⁹Buat ne'e, atu halo tuir lia hirak ne'ebé Nia dehan uluk: "Sira ne'ebé Ita haraik mai Ha'u, ida la lakon." ¹⁰Iha oras neba, Simao Pedro losu nia surik no hakanek am'lulik boot nia atan ida hodi sabir tiha nia tilun kuana. Atan ne'e naran Malco ¹¹Maibé Jesus lia tun ba Pedro: "Hatama o nia surik iha nia fatin! Ha'u sei la hemu kalis ne'ebé Ha'u Aman haraik mai Ha'u?"

¹²Tuir mai soldadu lubun ida ho sira nia na'i ulun no guarda sira kaer Jesus, hodi futu metin nia. ¹³Uluk knanain, sira lori nia ba Anas, Caifas nia banin. Iha tinan neba Caifas mak am'lulik boot. ¹⁴Caifas mak fó lia ba Judeu sira, dehan katak diak liu ema ida deit mak mate ba povu.

Pedro heli Jesus

¹⁵Simao Pedro ho eskolante ida seluk tuir Jesus. Eskolante ida ne'e, ne'ebé am'lulik boot hatene, tama ho Jesus ba am'lulik boot nia uma klabis. ¹⁶Pedro hela deit iha odamatan liur. Hafoin eskolante ida seluk ne'ebé am'lulik boot hatene, sai ba liur, koalio ho atan fetu ne'ebé hein odamatan, hodi lori Pedro ba uma laran. ¹⁷Atan fetu dehan ba Pedro: "O la'os ema ne'e mos nia eskolante ida?" Nia hatan: "Ha'u lae." ¹⁸Atan no guarda sira hamriik hela iha neba. Tan malirin, sira tau ahi hodi haneruk; Pedro mos haneruk hamutuk ho sira.

¹⁹Hafoin am'lulik boot husu ba Jesus kona ba nia eskolante sira no mos kona ba nia doutrina. ²⁰Jesus hatan ba nia, dehan: Ha'u koalio iha ema hotu nia oin. Ha'u hanorin bei-beik iha sinagoga sira no iha templu, iha ne'ebé Judeu hotu sira halibur hamutuk. Ha'u la subar lia ida. ²¹Tansa o husu Ha'u? Husu sira ne'ebé rona Ha'u, buat ne'ebé Ha'u hanorin sira. Sira hatene buat ne'ebé Ha'u dehan." ²²Jesus koalio tiha nune'e, guarda ida basa nia, dehan: "O hatan ba am'lulik boot hanesan ne'e?" ²³Jesus simu hodi dehan: "Ha'u koalio sala karik, ne'e sa hatudu to'ok mai; maibé, Ha'u koalio los karik tansa o basa Ha'u?" ²⁴Tuir mai Anas haruka Jesus ne'ebé futu metin hela, ba am'lulik boot Caifas.

²⁵Simao Pedro sei haneruk dau-daun, sira dehan ba nia: “O mos keta nia eskolante ida karik?” Nia heli lia, dehan, “Ha’u lae!” ²⁶Amlulik boot nia atan ida, ida ne’ebé Pedro sabir nia tilun nia parenti, hateten ba nia: “Ha’u la hare o iha to’os laran ho Jesus?” ²⁷Dala ida tan ba Pedro heli lia. Iha oras neba manu ida kokorek kedas.

Jesus iha Pilatos nia oin

²⁸Sira lori Jesus housi Caifas nia uma ba gobernador nia uma. Dadersan ona, sira la tama ba uma laran atu la bele sai foer, nune’e sira bele han Paskua. ²⁹Pilatos mai hasouru sira iha liur hodi dehan: “Imi kesar ema ne’e tansa los?” Sira hatan: ³⁰“Nia la’os ema aat karik, ami sei la saran Nia ba ita liman.” ³¹Pilatos dehan, “Tesi lia ba Nia ba tuir imi nia ukunfuan.” Judeu sira hatan fali ba nia: “Bandu tiha mai ami atu oho ema.” ³²Ne’e atu halo tuir lia ne’ebé Jesus hateten nanis ona oin sa Nia sei mate. ³³Ne’e duni, Pilatos tama fali ba uma laran. Nia bolu Jesus, hodi husu ba Nia: “O mak Judeu sira nia liurai?” ³⁴Jesus hatan: “O rasik dehan buat ne’e, ka ema seluk mak dehan ba o kona ba Ha’u?” ³⁵Pilatos simu hikas, dehan: “Ha’u ema Judeu ida? O nia povu no am’lulik boot sira mak saran o ba ha’u nia liman. O halo sa ida?” ³⁶Jesus hatan: “Ha’u nia reinu la’os raiklaran ne’e nian. Ha’u nia reinu raiklaran ne’e nian karik, Ha’u nia emar sira sei halo funu atu Ha’u la bele monu ba Judeu sira nia liman. Maibé, Ha’u nia reinu la’os raiklaran ne’e nian.” ³⁷Pilatos dehan ba Nia: “Ne’e sa o liurai duni?” Jesus hatan: “O mak dehan katak Ha’u liurai. Tan ne’e mak Ha’u moris, no tan ne’e mak Ha’u mai iha mundu, atu fó sasin kona ba lialos. Ema hotu lialos nian rona Ha’u nia lia.” ³⁸Pilatos husu fali: “Sa ida mak lialos?”

Dehan tiha buat hirak ne’e, nia sai fali hasouru Judeu sira, dehan: “Ha’u la hetan lia ida hasouru ema ne’e.” ³⁹Maibé, tuir imi nia lisan tinan-tinan iha loron Paskua, ha’u sei husik sai ema dadur ida. Ne’e duni, imi hakarak Ha’u husik ba imi Judeu sira nia liurai?” ⁴⁰Sira hotu hakilar: “La’os nia, maibé Barrabas!” Barrabas mak ema na’okten ida.

19

¹Tuir mai, Pilatos haruka ema lori Jesus hodi baku Nia. ²Soldadu sira halo koroa ai-tarak nian ida, no tau iha Jesus nia ulun. Sira tau ba Nia hatais unuk mean boot ida. ³Hafoin, hakbesik ba Nia, sira hasara Nia, dehan: “Viva Judeu sira nia liurai!” hodi basa tan Nia. ⁴Pilatos sai fali, hodi hateten ba sira: “Hare ba. Ha’u hatudu Nia ba imi atu imi hatene katak Ha’u la hetan sala ida iha Nia.” ⁵Nune’e Jesus sai mai iha liur, ho koroa ai-tarak no unuk mean. Pilatos dehan: “Ema mak ne’e!” ⁶Hare tiha Nia, am’lulik ulun no guarda sira hakilar, dehan: “Hedi Nia ba krus! Hedi Nia ba krus!” Pilatos hateten: “Imi rasik lori Nia ba, hodi hedi Nia ba krus, tan ha’u la hetan sala ida iha Nia.” ⁷Judeu sira simu: “Ami iha ukunfuan ida: tuir ukunfuan ne’e Nia sei mate, tan Nia foti an nudar Maromak Oan!” ⁸Rona tiha lia ida ne’e, Pilatos tauk liu tan. ⁹Tama fali ba uma laran, nia husu ba Jesus: “O mai housi ne’ebé?” Maibé Jesus la hatan ida. ¹⁰Tan ne’e Pilatos dehan ba Nia: “O la hatan mai? O la hatene katak ha’u iha kbiit atu hasai o, no mos iha kbiit atu hedi o ba krus?” ¹¹Jesus lia tun, dehan: “O la simu karik kbiit housi leten, o sei la iha kbiit ida hasouru Ha’u. Tan ne’e, ema ne’ebé saran Ha’u ba o nia liman, nia sala boot liu fali o nian.”

Sira tesi lia atu oho Jesus

¹²Tan ne’e Pilatos buka atu husik sai Jesus, maibé Judeu sira hakilar: “O husik nia sai karik, o la’os Cesar nia belun, tan ida ne’ebé foti an nudar liurai, nia foti liman hasouru Cesar.” ¹³Rona tiha lia hirak ne’e, Pilatos lori fali Jesus mai iha liur, hodi tur iha justisa tur fatin, naran “fatin fatuk belar,” ne’ebé iha lia Ebreu “Gabbata.” ¹⁴Loron ne’e, loron hadia Paskua nian, besik meio-dia. Pilatos hateten ba Judeu sira: “Imi nia liurai mak ne’e!” ¹⁵Sira hatan hodi hakilar: “Lori Nia ba, lori Nia ba; hedi Nia ba krus!” Pilatos husu ba sira: “Ha’u sei hedi imi nia liurai ba krus?” Am’lulik boot sira dehan: “Ami nia liurai mak Cesar deit.” ¹⁶Ne’e duni, Pilatos saran Jesus ba sira atu sira hedi Nia ba krus.

Jesus mate iha krus

¹⁷Tuir mai Judeu sira lori Jesus no Nia sai ba liur hodi Nia lori nia krus iha nia kbaas ba fatin ida naran “ulun ruin,” ne’ebé dehan iha lia Ebreu “Golgota.” ¹⁸Iha neba sira hedi Nia iha krus tutun, hamutuk ho ema na’in rua, ida iha sorin ida-ida, no Jesus iha klanan. ¹⁹Pilatos haruka hakerek ai-kabelak ida atu tara iha krus tutun. Hakerek nune’e: “Jesus Nazare, Judeu sira nia liurai.” ²⁰Judeu barak lee lafuan sira ne’e, tan fatin ne’ebé sira hedi Jesus besik sidade, no hakerek ho lia Ebreu, Gregu no Latin. ²¹Ne’e duni, am’lulik ulun sira hateten ba Pilatos: “Keta hakerek: ‘Judeu sira nia liurai’, maibé ‘Ema ne’e dehan: Ha’u mak Judeu sira nia liurai.’” Pilatos simu: “Buat ne’ebé ha’u hakerek ona, ha’u hakerek ona!” ²³Hedi tiha Jesus ba krus, soldadu sira hola nia unuk hodi fahe ba sira na’in hat. no mos nia hatais. Hatais ne’e la suku ida, ema soru naruk deit. ²⁴Tan ne’e sira dehan ba malu: “Ita keta les hatais ne’e: Ita koko deit sorte atu hare nia monu los ba se.” Nune’e sai tuir los lia eskritura ne’ebé dehan: “Sira fahe Ha’u nia hena ba malu, sira koko sorte ba Ha’u nia hatais.” Soldadu sira halo duni nune’e. ²⁵Besik Jesus nia krus hamriik nia inan, nia inan nia alin, katak Maria, Cleofas nia fen, ho tan Maria Madalena. ²⁶Hare tiha nia inan ho eskolante ne’ebé nia hadomi iha nia sorin, Jesus lia tun ba nia inan: “Na’in feto, o nia oan mak ida ne’e!” ²⁷Hafoin Nia lia tun ba eskolante: “O nia Inan mak ida ne’e!” No houri oras neba, eskolante ne’e simu nia iha nia uma. ²⁸Tuir mai, tan hatene ona katak buat hotu la’o tuir ona, atu halo tuir lo-los eskritura, Jesus dehan: “Ha’u hamrook!” ²⁹Iha neba iha kusi oan ida ho tua sin, tan ne’e, sira habokon hena ida iha tua sin ne’e, tau iha fafulu tutun, hodi lolo ba Jesus nia ibun. ³⁰Koko tiha tua sin ne’e, Jesus dehan: “Buat hotu tuir los ona,” hafoin, Nia halis nia ulun hodi saran nia klamar.

Soldadu ida sona boros Jesus nia sorin

³¹Tamba loron neba, loron hadia an nian, atu ema mate sira nia isin la bele hela iha krus iha loron Sabadu, tan Sabadu ne’e loron boot ida, Judeu sira husu Pilatos atu hatohar tiha sira ain, hodi hasai sira nia isin mate housi krus. ³²Ne’e duni, soldadu sira mai baku tohar tiha ema uluk nia ain, hafoin ida seluk nian, sira ne’ebé sira hedi hamutuk ho Jesus. ³³To’o tiha Jesus, tan hare Nia mate tiha ona, sira la hatohar nia ain; ³⁴maibé soldadu ida sona boros nia sorin ho diman, hodi halo be kahur ho ran suli sai. ³⁵Ema ne’ebé hare, nia rasik mak fó sasin ida ne’e; nia lia sasin los tebes; nia hatene katak nia koalialos atu imi mos bele fiar. ³⁶Ne’e mosu tuir los eskritura nia lia, ne’ebé dehan: “Nia ruin ida mos ema sei la hatohar.” ³⁷Eskritura seluk dehan tan: “Sira sei fihir ema ne’ebé sira sona boros.”

Ema hakoi Jesus

³⁸Tuir mai, Jose housi Arimateia, Jesus nia eskolante ida, maski subar deit tan tauk Judeu sira, husu lisensa ba Pilatos atu hasai Jesus nia isin mate no Pilatos fó tiha lisensa. Sira ba hodi hasai Nia isin mate. ³⁹Nicodemos, ema ne’ebé ba hasouru Jesus iha kalan, mai ho mina kahur ho naan horun no alo besik libra atus ida. ⁴⁰Sira hola Jesus nia isin mate, falun tiha ho hena mutin ida, hodi fakar tiha mina morin, tuir Judeu sira nia lisan atu hakoi mate. ⁴¹Iha fatin ne’ebé sira hedi Jesus iha krus, iha to’os oan ida no iha to’os ne’e iha rate foun ida iha ne’ebé seidauk hakoi ema ida. ⁴²Tamba Loron Hadia Paskua nian, no mos tan rate ne’e besik hela, sira hakoi Jesus iha neba.

20

Rate mamuk

¹Iha loron uluk semana nian, iha dadersan nakukun, Maria Madalena ba to’o rate. Hare fatuk iha rate nia oin duir tiha ba sorin, ²nia halai fali hasouru Simao Pedro no eskolante ida seluk ne’ebé Jesus hadomi, hodi dehan ba sira: “Ema lori tiha Na’i housi rate, ami la hatene sira tau los Nia iha ne’ebé!” ³Pedro ho eskolante ida seluk sai kedas ba rate. ⁴Sira halai hamutuk, maibé eskolante ida seluk lalais liu Pedro, hodi to’o uluk rate. ⁵Nia hakru’uk, hodi hare hena sira namkari iha rai, maibé nia la tama. ⁶Simao Pedro mos to’o tuir nia; nia tama iha rate laran hodi hare hena sira namkari iha rai, ⁷no mos hena mutin ne’ebé hodi falun Jesus nia ulun, hena ne’e la tau hamutuk ho hena seluk, maibé lulun ketak iha fatin seluk. ⁸Hafoin, eskolante ida seluk ne’ebé to’o uluk tama hotu. Nia hare hodi fiar. ⁹Tamba to’o oras ne’e sira nia neon la dauk nakloke ba lia eskritura nian katak Nia sei moris hi’as duni housi mate. ¹⁰Tuir mai eskolante sira fila fali ba uma.

Jesus mosu ba Maria Madalena

¹¹Maria fali hamriik iha rate liur hodi tanis, no sei tanis hela, nia hakru'uk hodi hateke ba rate laran. ¹²Nia hare anju na'in rua hatais mutin tur iha fatin ne'ebé sira tau Jesus nia isin, ida iha ulun, ida iha ain. ¹³Sira dehan: "Feto, tansa o tanis? O buka se?" Nia hatan ba sira: "Basa ema lori tiha ha'u nia Na'i, no ha'u la hatene sira tau Nia iha ne'ebé." ¹⁴Dehan tiha liafuan hirak ne'e, nia fila hodi hare Jesus hamriik iha neba, maibé nia la hatene katak ne'e mak Jesus. ¹⁵Jesus dehan ba nia, "Feto, tansa o tanis? O buka se?" Hanoin katak nia mak to'os na'in, Maria husu fali: "Na'i, ita mak lori nia karik, hateten to'ok mai ha'u ita tau Nia iha ne'ebé, atu ha'u bele ba hola Nia." ¹⁶Jesus dehan: "Maria!" Nia fila, hodi dehan ba Jesus: "Rabboni!" katak Mestre. ¹⁷Jesus dehan fali ba nia: "Keta kona netik Ha'u, tan Ha'u seidauk sa'e ba Aman. Maibé ba hasouru Ha'u nia maun alin sira, hodi dehan ba sira katak Ha'u sa'e ba Ha'u nia Aman no imi nia Aman; ba Ha'u nia Maromak no imi nia Maromak." ¹⁸Ne'e duni, Maria Madalena ba hateten ba eskolante sira: "Ha'u hare ona Na'i;" no nia hateten ba sira katak Nia dehan buat sira ne'e ba nia.

Jesus mosu ba eskolante sira

¹⁹Iha kalan loron uluk semana nian, uma iha ne'ebé eskolante sira hela, nia odamatan taka metin tan sira tau Judeu sira, Jesus mosu mai, hamriik iha sira leet, hodi dehan: "Dame hela ho imi!" ²⁰Koalia tiha nune'e, Jesus hatudu ba sira Nia liman no sorin. Hare tiha Jesus, eskolante sira haksolok teb-tebes. ²¹Nia lia tun teni ba sira: "Dame hela ho imi! Nudar Ha'u Aman haruka Ha'u mai, nune'e mos Ha'u haruka imi." ²²Hateten tiha ne'e, Nia hu'u iis ba sira dehan: "Simu ba Espiritu Santu!" ²³Sira ne'ebé imi perdua sira sala, sira hetan duni perdua ba sira sala; sira ne'ebé imi la perdua sira sala, sira la hetan duni perdua ba sira sala."

²⁴Tome, sira na'in sanulu resin rua ne'e ida, ne'ebé ema hanaran Kaduak, la hamutuk ho sira wainhira Jesus mosu. ²⁵Tan ne'e, eskolante sira hateten ba nia: "Ami hare ona Na'i!" Maibé nia hatan ba sira: "Ha'u la hare karik besi kusan nia kuak iha nia liman, la tau karik ha'u nia limanfuan iha besi kusan fatin, no la hatama karik ha'u nia liman iha nia sorin, ha'u sei la fiar."

²⁶Liu tiha loron ualu, eskolante sira halibur fali iha uma. Tome mos hamutuk ho sira. Odamatan sei taka hela, Jesus mosu hodi hamriik iha sira leet, dehan: "Dame hela ho imi!" ²⁷Hafoin Nia hateten ba Tome: "Tau o nia limanfuan iha ne'e, no hare Ha'u nia liman; lolo o nia liman hodi hatama iha Ha'u nia sorin. O keta laran tos, maibé fiar!" ²⁸Tome hatan: "Ha'u nia Na'in, ha'u nia Maromak!" ²⁹Jesus lia tun teni ba nia: "O fiar tan o hare tiha Ha'u? Rahun diak ba sira ne'ebé fiar maski la hare."

³⁰Jesus halo sinal seluk barak tan iha nia eskolante sira oin, ne'ebé la hakerek iha livru ne'e. ³¹Maibé sira ne'e hakerek atu imi fiar katak Jesus mak Kristu, Maromak Oan; atu nune'e, hodi fiar, imi hetan moris hodi Nia naran.

21

Jesus mosu iha tasi Tiberiades nia sorin

¹Tuir mai, Jesus mosu dala ida tan besik tasi Tiberiades. Nia mosu nune'e. ²Simao Pedro, Tome ne'ebé hanaran Kaduak; Natanael housi kana Galileia nian; Zebedeu nia oan sira, ho tan eskolante na'in rua, halibur hamutuk iha neba. ³Simao Pedro hateten ba sira: "Ha'u ba tiha ikan." Sira dehan ba nia: "Ami mos ba hotu." ⁴Iha rai hun mutin, Jesus hamriik iha tasi ibun; maibé eskolante sira la hatene katak Nia mak Jesus. ⁵Nia dehan ba sira: "Labarik sira, imi iha buat ruma atu han?" Sira hatan: "La iha." ⁶Nia simu fali: "Imi soe dai ba sorin kuana, imi sei hetan." Ne'e duni, sira soe dai, hafoin sira la bele dada mai, tan ikan barak liu. ⁷Tan ne'e, eskolante ne'ebé Jesus hadomi hateten ba Pedro: "Nia mak Na'i!" Rona katak Na'i mak neba, Simao Pedro hatais tiha, basa nia isin tanan, hodi haksoit ba tasi laran. ⁸Eskolante sira seluk tama iha ro laran, hodi dada dai ne'ebé nakonu ho ikan, basa sira la dook housi rai, besik metru atus ida.

⁹Tun tiha ba rai, sira hare ahi klaak ho ikan iha leten ho tan paun. ¹⁰Jesus hateten ba sira: "Imi lori ikan balun ne'ebé imi foin kaer mai." ¹¹Simao Pedro sa'e ba ro hodi dada dai ba rai, ho ikan nakonu; ikan boot deit atus ida lima nulu resin tolu. Maski barak nune'e, dai la nakles. ¹²Jesus dehan ba sira: "Imi mai han." Eskolante sira ida mos la berani atu husu ba Nia "Ita se los?" tan sira hatene katak Nia mak Na'i. ¹³Jesus hakbesik, kaer paun, hodi fó ba sira; nune'e mos ho ikan. ¹⁴Nune'e ba dala tolu Jesus mosu ba nia eskolante sira, liu tiha Nia moris hi'as housi mate.

¹⁵Sira han hotu tiha, Jesus husu ba Simao Pedro: "Simao, Joao nia oan, o hadomi Ha'u liu fali sira ne'e?" Nia hatan: "Tebes, Na'i, Ita hatene katak ha'u hadomi Ita." Jesus dehan ba nia: "Fó han Ha'u nia bibi-oan sira." ¹⁶Dala ida tan Nia husu: "Simao, Joao nia oan, o hadomi Ha'u?" Pedro hatan: "Tebes duni, Na'i, Ita hatene katak ha'u hadomi Ita." Jesus dehan ba Nia: "Tau matan ba Ha'u nia bibi sira." ¹⁷Ba dala tolu Nia husu: "Simao, Joao nia oan, o hadomi Ha'u?" Pedro neon sala, tan Jesus husu dala tolu ona ba nia "O hadomi Ha'u?" Nia dehan ba Nia: "Na'i, Ita hatene hotu, Ita hatene katak ha'u hadomi Ita." Jesus hateten ba Nia: "Fó han Ha'u nia bibi sira. ¹⁸Tebes, tebes, Ha'u dehan ba o: wainhira o sei klosan o rasik mak hatais an, hodi la'o ba fatin ne'ebé o hakarak; maibé katuas tiha, o sei lolo liman atu ema seluk fó hatais o, hodi lori o ba fatin ne'ebé o lakohi." ¹⁸Nia koalia nune'e atu fó sai oin sa Pedro sei hetan mate hodi fó gloria ba Maromak. Tuir mai, Jesus dehan ba nia: "Tuir Ha'u mai."

²⁰Pedro fila hodi hare katak eskolante ne'ebé Jesus hadomi tuir sira, katak, ida ne'ebé sader ba Jesus nia hirus matan wainhira sira han, hodi dehan, "Na'i, se los mak sei saran Ita ba mate?" ²¹Ne'e duni, hare tiha nia, Pedro husu ba Jesus: "Na'i, kona ba nia?" ²²Jesus hatan: "Ha'u hakarak karik katak nia hela to'o Ha'u mai fali, ne'e sa ida ba o? O tuir deit Ha'u!" ²³Housi ne'e mosu lia ida iha eskolante sira leet, katak eskolante ida ne'e sei la mate. Maibé Jesus la dehan ba Pedro, "Nia sei la mate;" Nia dehan deit "Ha'u hakarak karik nia hela to'o Ha'u mai fali, ne'e sa ida ba o?" ²⁴Ida ne'e mak eskolante ne'ebé fó sasin kona ba buat hirak ne'e, no hakerek tiha buat hirak ne'e, no ami hatene katak nia sasin los. ²⁵Jesus halo tan buat barak seluk: atu hakerek buat ne'e hotu, ha'u hanoin katak iha mundu tomak la iha fatin atu tau livru sira ne'ebé sei hakerek.